

WEURDJE VANNE VORST



Laot mich uch vertèlle euver d'n hõndj en de frikedel.

Doa is ein zègswiës en diej luidj es volgtj: 'de mós neet wiej eine hõndj op ein frikedel vleege...' En det kloptj! Het is de gerispekteerdje, wiëze en òngertösse ouch griëze Jos Vandewal dèe oëjts mèt diej oëtspraak aaf

kwaam. Nòw heet Jos vanzelèeve al veul oëtspraoke gedaon diej ich mich 25 jaor nao datum nog good kin herinnere. Jos is altiëd gevatj gewèest. Mer diej van d'n hõndj en de frikedel: diej stiktj ter allewiel toch bovenoët.

De mós probere alzelèeve good nao te dinke veur desse get zègks, beslistjs, duis of köps. De zouws ouch kinne zègke: "Gank neet euver eine nacht iës", det kumpj op hetzelfde niër.

Ouch in de kòmendje vastelaovesdaag is het aangeweze òm dich aaf en tòw hël-op de vraog te stèlle: "Bèn ich nòw neet wiej eine hõndj op ein frikedel aan 't vleege?" Ich dink mer aan volgendje zake diej ter zouwe kinne gebeure. Maak veur uch zelf mer ins de aafwèging!

- De bès d'n hoeëssleutel kwiët en de hõbs al 11 kiër nao de partner gebeldj mer m/v/x puktj neet op...
- Diën bõnne zeen op, de bès blut en de bank het kortste bij ligktj in Bieësel...
- De stuis aan te sjuuëve veur het huuëske, dèe veur dich vertèljt ein mòp en de merks desse vannet lache ei bitje inne bõks hõbs gesjeete...
- Dao knoëjtj eine mèt beer op diën humme en dèe verrèktj het òm sorrie te zègke...
- Op het bal nao de stoet weurse van oët het niks hartsjtikke verleefdj...

Neet gemekkelik!


Dink dus mer aaf en tòw aan d'n hõndj en de frikedel. Tèl tot 11. Den stuis röstiger in het lèeve. Den geise minder mèt de kop tege de moor knalle. En missjien bespaartj het dich op het inj veul mizeriej.

Prakkezeer ter mer ins euver! Wèe zeen òs mèt diej daag!

Fijn karnavalsdaag gewinstj! Vastelaovendj same!

Vorst Mark

*Jeugdraod Alaaf!
Rabbedabbers Alaaf!
Kinder Alaaf!*



43^{ste} jaorgank

RABBEDABBERS
2023

MÈT IN DEES EDISIE

- 46 jaor Kinderse Rabbedabbers, efkes inne achteroëtkiëkspeegel loore...
- Ei geheim resept van Pool Frit!
- Begraffenisse Vancleef wiltj kleinere ekologisse vootaafdruk!
- Wolfwatsj in Kinder!
- Kinderse verkesbore zeuke alternatieve inkòmste!
- Niks es mizeriej mèt kòmposteerbare fritbekskes!
- Olieboring Moubax dreijtj oët op niks!
- Zörgvlied noeëgedwõnge fors aan 't bespare!
- Miel Vandewal volledig gereviseerdj!
- Peter Cremers' Diner oppe Goërt!
- Kinderse kritisse dinkers: wèem zeen ze, waat drieftj ze?
- Lennert Jaroszewski is transgemeintjelijk!
- Minister Brouns wiltj ouch zwartwirk gaon belaste!
- De krisis aktuweel: zwarte snieë in Kinder!
- Kinderse klimaataktivist zeuktj nao meneer òm aksie te veure!
- Gemeindj wiltj miër daakloze inne strijd tege verspilling van ète!
- Ed Smeets puktj Twitter euver!
- Wout Hoeken wintj Kinderse poëziejpriës!
- Losloupzone veur hunj kriëgtj aafspuitkabiën!
- Lèezersbreeve, smskes, epkes of meejlkes aane Rabbedabber!
- De Baer 2023!



PROKLAMASIEJ PRINS BÈR I

Mèt
de
grasiej
vanne

Veurzitter en
miëne veurgaondje
Prins, mèt de zèege
vanne Aod-Prinse
verklaor ich hiejbiej
vandaag miën èllef punte.

TEN IEËSTE: Ich, Bèr Smeets,

bèn vandaag zoë gruuëts es get.
Want ich maag uch vertèlle dèt ich dit
jaor door het lèeve kan gaon es 44e groeëte
prins vanne Rabbedabbers van Kinder es:

Prins Bèr den 1e !

TEN TWIËDJE: Al 15 jaor bèn ich mèt Maria
getrouwdj, en ouch in mie prinsejaor zal ze mich
biejstaon euveral! Mèt anger weurd: ouch **Prinses
Maria** löptj dit jaor veurop inne karnavall!

TEN DÖRDJE: Miëne zoon Gilles haaj verdikke gèer
Jeugdprins wille wèere, mer det heet corona door ziën naas op
geboordj! In plaats van hèe mich, maak ich dit jaor hum gruuëts.
Gilles: ich gèef dich mie woord!

TEN VEERDJE: Es pluspapa van Kristel en Jan, en Martine en Bart, en
es pake van Lotte, Guus en Hanne höb ich de henj dèk mieë es vol! Mer de
kômendje maondje zulle zië mich moge steune bij dees bezunjer taak, nòw is
het efkes 'lang lèeve de lol'!

TEN VIËFDJE: Ich sjravel al 27 jaor mèt de fits nao Nerootere nao het wirk, euver diej
vrèkke gevaorlikke baan! Es Prins open ích strak waal det sjik nòw fitsepaad, börgervader
dao haaj ich dich aan!

TEN ZËSDJE: De Landelikke Gilde van Kinder is ei deil van mie lèeve, en dao bèn ich pas
veurzitter van gewore! Ich nuuëj bij deze al hiël miën gildekammeraöj oët veur de beebieborrel
mörge, ich wèer vandaag immers es Prins gebore!

TEN ZEEVENDJE: Bij fitsklup Team Velox pômp ich de benj vol locht en trèk ich ei spannendj pekske
ròndj de boëk en de klitse. Ich bengel altiëd achteraan inneret pilleton, en bèn ouch kiër op kiër es lèste heivis
nao het fitse.

TEN ACHTSTE: Oppe voetbal bij Maaslandj kôm ich gèer tot röst. Zoelank es ich Prins bèn, wil ich det ze punte
skore: winne is ein möst!

TEN NEEGENDJE: Mie Prinsebal geit door inne Sjans, op vriëdig 27 janewariej van dit jaor. Wèe gaon Alex ziën frigo's
leeg drinke dèen daag. Same kriëge wèe det gemekkelik klaor! Mèt de stoet verwacht ich hiël Kinder oppe bein, klein en
groeët, jônk en aod! Kermelle rape, fiëste en tempiëste, zoë kriegtj neemes het kaod!

TEN ÈLLEFDJE: Bjôs ma heet 'r noëjts aan getrokke. Alzelèeve zag ze mich: "Bèr, es ze dich oëts Prins wille make,
zègk nèe estebleef." En nateurlik knikdje ich den braaf. Ich weit zeker det ze het nòw toch sjik geit vinje: heure zoon
mèt de vèere oppe kop dèe de scepter maag zweije. Dus roop ich: "Kinder alaaf!"

Gedaon te Kinder inne sporthal oppe 44e
Prinsezitting van 14 janewariej 2023 door ugge
44e groeëte Prins van de Rabbedabbers van
Kinder, Graaf van de Goërtwèeg, Hertog vannet
Dörp, Baron van het good lèeve, van platte
bandj tot aan 't buffet.

Ugge euvergelökkige **Prins Bèr den 1e**

*Miën leuze veur dit jaor
zal dèn auch zeen :*

*Of het nòw eine halve
liter is, of eine kleine:
doot 'r nog mer eine!*

PROKLAMASIEJ JEUGDPRINS KENT I & JEUGDPRINSES SILKE I



TEN IEËSTE:

Ich
bèn Kent
Brouns, zoon
van Dirk Brouns en
Renate Henckens.

Mer vanaaf vandaag maag
eederein mich aanspreeke
es Jeugdprins Kent den 1e!

TEN TWIËDJE: En ich bèn
Silke Smeets, dochter van Frank
Smeets en Ann Baens. En vanaaf
noë tot volgendj jaor rôndj deze tiëd,
heit ich Jeugdprinses Silke de 1e!

TEN DÖRDJE: Mèt 2 zösters, Kate en Jamie,
2 knieën, 2 hoonder, Max d'n dwergpappegeij
en Ollie de Border Collie zitj bjôs de koeëj ram
vol! Het zal uch den ouch niks verbaze, miën favoriete
karnavalsplaat is van de Alpenzusjes: Hiëlemaol Dol!

TEN VEERDJE: Bjôs make Bo d'n hândj en mië zöster
Laure same mèt mich het sjoeën wèer! En de kômendje
tiëd same karnaval veere: det doon ich toch zoë gèer!

TEN VIËFDJE: Ich höb eine blauwe bandj in judo, ich
smiët dich wiej niks door de locht! Mer maak uch mer gein
zörg: het goëje gebeurdj allein mèt slök, inne optocht!

TEN ZËSDJE: Bij de Chiro kin ich mich oëtlêeve, spellekes speule, lache en raoze!
En mèt de saxofoon kin ich uch mèt de sjikste leedjes bônk òmver blaoze!

TEN ZEEVENDJE: Mèt eine bril en ein fles locht oppe rök duuëk
ich tot 10 mèeter deep òm te kiëke nao het òngerwaterlêeve! Mer mèt de
karnavalsdaag haoj ich het druuëg, den is het bove water volle bak gaas gèeve!

TEN ACHTSTE: Mèt det jaor oëtstèl zitte wèe al oppe middelbare sjoëël,
òzze tiëd op 3K liktj achter de rök! Mer mèt de vriëdig vanne karnaval, stèeke
wèe toch nog ins de straot euver: den gaon wèe eine naomiddig trök!

TEN NEEGENDJE: Fritte mèt bicky: òm doëme en vinger bij aaf te lekke, ein daagsjotel boe ich
eedere daag op maag hope! Al mer good det wèe hiej in Kinder 5 friture höbbe: dao is ter altiëd ein opel!

TEN TIËNDJE: Waat ich later wèere wil, dao bèn ich nog neet mèt bezig, mer ich höb zoewiezoë
gooje hoop! Nog alle tiëd en alle keus, dus ich kin nog 'druime mèt de ouge oop'!

TEN ËLLEFDJE: òs leuze veur dit jaor zal zeen:

Nao ein ekstra jaor wachte en zwiëge wiej ei graaf...

Is het nòw eindelijk aan òs! Volle bak Kinder alaaf!



Prins Bèr 1 & De Rabbedabbers

bedanke dees hanjelèers veur hunne steun!

- Aardbeien Royakkers Jan en Gijs
- Aardbeienkwekerij Albert Royakkers
- ADS + Yanco Schols
- Afwerkingsbedrijf Baens
- Afwerkingsbedrijf Carpentier
- Algemene Kitwerken Jacky Neyens
- Alulim
- Amerikaanse Stock Geelen
- Amesco
- Apotheek Peeters
- Bandenshop Kinrooi
- B-art Schilderwerken
- Begrafenisondernemer Vancleef
- BK Concept
- Bloemencreaties Monique
- Boekhoudkantoor Zontrop
- Bouwmaterialen Deckers
- Café De Grenshook
- Café De Limburger
- Café Sport
- Café 't Rondpunt
- Coolen Theo Transport
- Crevaro
- De Bakmiep
- De Schoonheidshoeve
- Dierenartsenpraktijk De Moreé-De Clippeleir
- Dokter Bullen
- Dokter Hechtermans
- Domen Drinks
- Easycom
- EGS Electro
- Ellen's Hairdesign
- Ergonomics
- Fietsen Erik Henkens
- Fietsshop Vandewal
- Frituur Favofrietje
- Frituur 't Hapje
- Frituur 't Simpelke
- Garage Benny Jacobs
- Garage Willy Brouns
- Garage Winters
- Grond- en Waterwerken Heymans
- Haarstudio Suzy
- Herenkapper Piet Verstraeten
- JEKO Verhuur
- JODA Airco Depot
- JSJ Interieur
- Kapsalon Marie-Thérèse
- KARO
- KD Interieurbouw
- Keukens Vanthoor
- Kinesist Julien Loyen
- Kinesiste Ann Geelen
- Kinesiste Ilse Jacobs
- Kinesiste Stefanie Joosten
- LS Car Service
- Lunchbox
- Marissa Di Girolamo
- Mekano Play
- Naaimachines Janssen
- Nachtwinkel 't Dorp
- Notaris Debucqouy
- Openhaardenbouw
- Optiek Raquel Staeren
- Pedicure Arlet Clerix
- Press & Paperclips
- Quix Hout & Bouw
- Radio Monza
- Rakoma
- Ramen Gorissen
- Rij Opleiding Rik
- Rijschool Maasland
- RS Photography
- Ruby's
- Sanitair Erik Brouns
- Schoonheidssalon Maryeska
- Schrijnwerkerij Steensels Patrick
- Segers – Teeuwen Brandstoffen
- Segers Snacks
- Sportcafé De Schans
- Stan Linssen Verzekeringen
- Steengoed
- 't Stampertje
- Takelbedrijf Vanderveken
- Tandarts Vandenende
- Tattoo Jos Breukers
- Tentenverhuur Danny Theybers
- Tentenverhuur Jan-Arie De Jong
- Tony Vanwijck Sanitair
- Traiteur Peter Creemers
- Transport Pascal Gabriëls
- Tuinaanleg en -onderhoud Frank Smeets
- Vangeloven Agri
- VDS Electronics
- Verheyden Elektriciteitswerken
- Verpleegteam Ine Tholen
- Verzekering Schaekers-Nijsten
- Verzekering Teuwen Stefan & Partners
- Willen Security
- Woodtec
- Zakenkantoor Rudy Theijbers

Spisjale dank aan fam. Linssen-Beckers veur het kinne gebruuëke vanne karnavalsloëds!



*Het is mèt door ugge steun
det de Kinderse karnaval
kintj bliëve bestaon!*



46 Jaor Kinderse Rabbedabbers, efkes inne achteroëtkiëkspeegel loore...

Trökblik oppe 4 x 11 jubilee

De Kinderse Rabbedabbers bestaon 44 jaor! Ôngertösse al 46 en ein klets, mer kôm.

Op 11 november 1976 is dees geweldige vereniging ôntstange.

In gesjrifte oët deen tiëd stuit letterlik het volgendje:

Op 11 november 1976 ôm 11:11 ore is ter te aod-Kinder ein karnavalsvereniging gestichtj ônger de naam Rabbedabbers. Dees vereniging heet es doel: het bewirkstëllige van ein gepasdje karnavalsvering- en stoet in oad-Kinder en zoëdoondje het bevordere, gebruuëke en in standj haoje van ein volkseige tradisie.

En of ze det deeje, al 46 jaor aan ei stök. Het wore de vereinigdje hanjelèers diej de Rabbedabbers hōbbe opgerichtj. Boëveur dank! De middestandj regeertj het landj zōng Luc De Vos in ziën waallicht bekindjste nummer Mia. Hèe haaj geliëk en is missjien hiej in Kinder de mosterd daoveur kōme hole?

Ei paar jaor later al verveldje het kader van diej vereinigde hanjelèers nao eine struktuur boë-in ouch neet-hanjelèers koste tōwtreeje tot de Raod van Èllef. De vereniging kwaam tot wasdôm en bluj. Eeder jaor ein Prinsezitting, mèt het aafgaon van de veurgaondje en de geboorte van eine nōwwe Prins. Hetzelfdje verhaol veur waat betreft

de Jeugdprins en later ouch de Jeugdprinses. En vanaaf 1984 ouch ein Prinses, es dèe Prins in kwestie diej haaj nateurlik. Geëmancipeerdj! Wèe lage toen al 40 jaor veur op Mezeik!

Ouch ei Prinsebal, ein stoet, ei jeugdbal waat ôngertösse ein volwaardige Jeugdprinsezitting is, ei kaffeebazebal det verveldje tot ei maondigaovendj verklèd bal, en later ein dialekoëtzing op Radio Monza mèt ieëst eine en daonao twië aan de loupndje bandj sjëele zeiver verkoupendje kwatsjers diej oore aan ein stök de radio kape en de vaste loeësterèers het zweet oppe rök doen kriëge. Ze pakke zelfs d'n tillefoon neet mi op, en dao staon bij Monza nog net gein celstraofe op!

De Zitting is door de jaore hèer allein mer gruuëtser gewore, de stoet is al ei paar kiër van roete verangerdj en het jeugdbal – boë-det het aod Jeugdprinsepaar aafging en het nòw paar woor gebore – is zoë-es zjust al gezag getransformeerdj nao ein echte, sjikke Jeugdprinsezitting. Het maondigaovendjbal is vanne aoje fōmfarezaal nao de kaffees gegange, en het Prinsebal is vanoët de aoj parochiezaal (nao d'n aafbraak) aan ein reis begos langs het sjöttelokaal vanne Brookhook tot op hede in Sportkaffetarieja De Sjans.

Dao zeen door de jaore hèer nateurlik ouch fiëste en aktiviteite gewèest diej d'n tandj des tiëds neet hōbbe euverlèefdj. Es get det grujtj

en blujtj neet aaf en tōw weurdj gesnoeidj en ôngerhaoje, geit het mis. Of jeh, in dees kontekst weurdj het bos den zoë weustig det gei mins ter nog door-op geraaktj. Gèe snaptj mich waal...

Sins de zomer van 2021 wirke wèe mèt Jokers en Adjudante. Op 15 augustus, nao ôs jaorlikse fitstocht, gaon de Raod van Èllef en de Aod-Prinse in eine groeëte sirkel staon, oëtgezunjerdj de Vorst en de veurzitter. De kaarte wèere gesjōdj en oëtgedeildj. De 2 luj diej eine joker hōbbe gekrege, wèere belastj ôm op zeuk te gaon nao eine nōwwe Prins. En op het momentj det dèe Prins oppe ieëstkōmendje Prinsezitting weurdj gebore, wèere ze adjudantj vanne Prins (enne Prinses). Bij de Jeugdraod: zjust van hetzelfde!

Waat ter waal al diej jaore is gewèest en tot op d'n daag van vandaag is gebleeve: karnaval is van de minse, en het geit simpel gezag euver het veere vannet lèeve en van ôs bestaon. Prinse en Prinsesse, lede van de Raod van Èllef, de Aod-Prinse en de Jeugdraod: al diej luj diej same 'de vereniging' vorme. Neet te vergèete: de vroluuj, zōnger wèem wèe nōrges zouwe staon. Helpers veur en achter de sjerme, anger vereniginge van kortbij of get wiejer aaf, aanwezig op al diej aktiviteite, kortôm: eederein, karnavalliste, groeët en klein.

Oët hiël dèe groep minse – gekke minse – zeen ter door de jaore hèer

al ei deil weg gevalle. Neet allein bieje òs mer ouch bieje anger vereiniginge. Ich gaon gein name numme, want den zouw ich ter missjien eine vergèete. Mer wèe weite allemaol waal wèem ze zeen, kinne ter zoëwiezoë zelf eine of inkele. Det feit allein al, muktj det diej luj neet zulle wèere vergèete. Ze bliëve ei wèezelik deil van de gesjiedenis vanne karnaval in òs dörp, òzze naober, òs kòntreije. Ze zulle veur altièd eine brik zeen in het huuëske van lol en plezeer waat dit volksfièst is. De herinneringe bliëve euver, en bliëve intellektueel en sentimenteel eigendôm van de langst lèevendje ônger òs...

4 x 11 + 2 Kinderse Rabbedabbers: det kabbeltj richting de hawf ieëw en det opzich is al finnomenaal. En es ich den kiëk nao het hiej en het nòw, den bèn ich geröst. Want diej Prinsepare groeët en klein, dèe Raod van Èllef, diej Aod-Prinse, dèe Jeugdtraod en al die sterke vroluuj achter al die manskèerels: det is kapitaal!

De sôm van al die deile is groeëter es het gehiël. Door de aorta vanne vastelaovendj in Kinder struimtj nog genôg blood en zuurstôf. Ich bèn fier op uch, es Vorst, en ich bèn blij det ich uch kin. Vrunj tot de allerlèste runj!



Ein ieërbetoën aan Paul Janssen, 46 jaor lid en stichtendj lid, en aan Monik

Paul en Monik stamme oët eine tièd det engagemente nog ein en ôndeilbaar wore. Veur het lèeve. Op 11 november 1976 waas Paul ein van de stichtende lede, en same mèt Monik is ter d'r nòw nog. Prins gewèest in 1979, d'n twièdje Prins vanne Kinderse Rabbedabbers, toen nog zônger Prinses. Mer, Monik, geluif mich: veur òs en bieje oëtbreijing veur hiël Kinder, bèste ein Prinses.

Es de karnaval in Kinder ter waas, wore ze dao. Alzelève. Achter de sjerme woor ter gewirktj door allebei, keihèl. De stoofjas aan, het bolheudje oppe kop. Monik haaj altièd minder aan, mer det heet noëjts eine erg gevônje. Gèe moogtj 'r nog zeen, Monik. Wèe snappe Paul mer al te good es gèe noa het hèl wirke same het bad in gaodj, en daonao op wèereldjreis.

Ôngertösse al efkes aan 't geneete van uch pensjoen same, nao ei lèeve ten deenste van rammelendje mage, fiënpreuvers én de karnaval. En waat det lèste betreftj, moge wèe uch absoluut ei veurbeeldj numme van aktieve sinjore.

46 jaor ônaafgebroke lid. 46 jaor Rabbedabber. Den bèsse mèt ei stök vanne fundering, boeëte-, binnemoor én daak. Huuëske weltevreë is same mèt uch gebôwdj en het zal ouch alzelève eine toës veur uch blieve. Verlaotj òs estebleef noëjts.

Ein ieërbetoën aan Bart Neel, 11 jaor veurzitter en ôngertösse d'n hamer doorgegeëve

In 2006 kwaam Bart in beeldj bieje de Kinderse Rabbedabbers, es papa van Jeugdprinses Iris I. De radar vanne vereiniging sting ouch toen al good aafgestèldj, want eine mins dèe ônbaatzuchtig dinger duit veur ein anger, dèe de henj oët de mòwwe stiktj es det nuuëdig is en neet op ein inspanning mieë of minder kiëktj: dèe wilse aan boord haoje. Zoë ging het ouch mèt Bart. De Brookhook zaag ein groeëte kracht d'n euverstap make vanne buurtvereiniging nao de Rabbedabbers. Eine toptransfer numme ze det.

Al hiël snel pôk hèe de taak van ôngerveurzitter op zich, ôm al in december 2009 (op òs 3 x 11 fièst waas det) de veurzittershamer euver te pakke van Ivo Theijs. Eine

maondj later woor Mark de nòwwe Vorst, en zië gave zich òngerein ein handj: “Dit verkske gaon wèe same wasse, en det veur de kòmendje 11 jaor.”

Bart heel wiej eine volliërdje jonglääor miërdere bølkes tegeliëk inne locht, gaaf op ziën eige wiës ein nòw elan aan de vereniging en dao ginge letterlik doëzendje kilo's slòk door ziën henj. En – ieërliek is ieërliek – Bart is verantwoordelik veur 2 geweldige initiatieve: op aktiviteite ei paar pintjes boeëte kòmpetisiej drinke en bifstökke tösse Jeugdzinging en Groeëte Zitting. 😊 Alle gekheid op het stekske: Bart heet mer leefst 12 jaor het veurzittersjap waor genômme en daomèt is diej aafsprak vanne wintjer van 2009-2010 mèt vèrve naogekômme. De langst zittende veurzitter oët de gesjiedenis van òs vereniging. Wèe, en karnavalsminnendj Kinder, staon bije dich in het kriët.

Bart: de bès ein oët doëzendj. Wèe danke dich veur alles waat desse höbs gedaon veur de Kinderse Vastelaovendj en hope desse nog jaore bjòs bliëfs, zònger veurzitterszörg aane kop.



Jeugdraod 2023



Dames RvE en Aod-Prinsesse 2023



Wist gèe det...

... 44 jaor geleeje, in 1979, **Paul 1 Janssen** de 2dje groeëte Prins van Kinder waas.

... 33 jaor geleeje, in 1990, **René 2 Lantmeeters en Lisette 1 Snijkers** het Prinsepaar van Kinder, en **Danny 2 Bakkers en Inge 1 Brouwers** het Jeugdprinsepaar wore.

... 22 jaor geleeje, in 2001, **Jean 6 Van Eygen en Marie-José 1 Pagers** groeëte Prins en Prinses wore, en **Sean 1 Steensels en Jacintha 1 Brand** Jeugdprins en Jeugdprinses wore.

... 11 jaor geleeje, in 2012, **Dirk 2 Bogie en Inge 1 Vandebecck** es Prinsepaar, en **Jordi 1 Moonen en Laura 1 Janssen** es Jeugdprinsepaar veurop ginge.

... 11+1 jaor geleeje, in 2011, **Christof Meurs** KVG-Prins waas. En det Christof nog altiëd mèt ôs mèt duit oppe Zitting, bij Monza, oppe Stoet, en waat nog allemaol!

... **Mathy Kwaspén** dit jaor is oëtgerope es **Ridder inne Orde vanne Rabbedabbers**.



Dik 4 decennieja geleeje...



Vereiniging anno 2023

Prinse, Prinsesse, Ridders, Kroeënriders, Opperkroeënriders, Veurzitters en Vorste door de jaore hèer

46 jaor Kinderse Rabbedabbers, 46 jaor carnaval in aod-Kinder. Det is hiël get, det is eigelik erg bezunjer! Het stuit ôs sjoën det wèe in dees jubileumgezèt ins efkes dankbaar en gruuëts ômkiëke nao de veurbieje hawf ieëuw. Ins opliëste wèem al diej leef luj zeen diej alzelève mèt de Kinderse vastelaovendj oppe kaart hōbbe gezat. Sōmmige zeen al efkes neet miër ônger ôs, mer heur verdeenste veur de Kinderse carnaval zal altiëd bliëve...

Prinse en Prinsesse

1e	21/01/1978	Piet I Verstraeten
2e	03/02/1979	Paul I Janssen
3e	05/01/1980	Gerard I Bullen
4e	10/01/1981	René I Segers
5e	09/01/1982	Koen I Smeets
6e	08/01/1983	Jan I Houben
7e	07/01/1984	Jean II Brouns

1e Christel I Brouns

8e	05/01/1985	Jef I Eerdekens	2e	Linda I Eerdekens
9e	11/01/1986	Herman I Janssen	3e	Tiny I Janssen
10e	10/01/1987	Toine I Heymans	4e	Mia I Kerkhofs
11e	09/01/1988	Jan III Cuypers		
12e	07/01/1989	Jean IV Knippenberg		
13e	13/01/1990	René II Lantmeeters	5e	Lisette I Snijkers
14e	12/01/1991	Freddy I Janssen	6e	Sabien I Poelmans
15e	11/01/1992	Jan V Linssen	7e	Reinhilde I Smeets
16e	09/01/1993	Veus I Peerlings	8e	Angèle I Heymans
17e	08/01/1994	Marc I Vrolix	9e	Sonja I Opdelocht
18e	14/01/1995	Eric I Van Eygen		
19e	13/01/1996	Jos II Moubax		
20e	11/01/1997	Marc II Lemmens	10e	Suzanne I Vandewinkel
21e	10/01/1998	Dominiek I Verbeek		
22e	09/01/1999	Willy I Fiddelaers	11e	Lutgarde I Knoops
23e	08/01/2000	Miel I Vandewal	12e	Yvette I Steensels
24e	13/01/2001	Jean VI Van Eygen	13e	Marie-José I Paggers
25e	12/01/2002	Albert I Royakkers	14e	Christa I Weltjens
26e	11/01/2003	Dirk I Mooren	15e	Nathalie I Gerits
27e	10/01/2004	Ivo I Theys		
28e	08/01/2005	Jean VII Vanfloorop	16e	Gerda I Verstraten
29e	07/01/2006	Jack I Vossen	17e	Christel II Costens
30e	13/01/2007	Danny I Kunnen	18e	Debora I Vanham
31e	12/01/2008	Bennie I Verlaek	19e	Wendy I Thaens
32e	10/01/2009	Danny II Jaroszewski	20e	Evelyne I Vaesen
33e	09/01/2010	Tony I Vanwijck	21e	Marijke I Voets
34e	08/01/2011	Jos III Breukers	22e	Heidi I Verkissen
35e	14/01/2012	Dirk II Bogie	23e	Inge I Vandebecck
36e	12/01/2013	Bart I Vanderstegen	24e	Yolanda I Baens
37e	11/01/2014	Bart II Janssen	25e	Debbie I Korsten
38e	10/01/2015	Wout I Hoeken	26e	Lisbeth I Goffings
39e	09/01/2016	Roland I Dirckx	27e	Petra I Thijs
40e	14/01/2017	Marc III Voortmans	28e	Lut II Schouteden
41e	13/01/2018	Hendrik I Neyens	29e	Kim I Brouns
42e	12/01/2019	Bart III Kunnen	30e	Gaelle I Ooms
43e	11/01/2020	Sven I Beelen	31e	Evy I Verstraeten
44e	14/01/2023	Robert I Smeets	32e	Maria I Van Eygen

Jeugdprinse en Jeugdprinsesse

1e	20/02/1977	Tjeu I Janssen		
2e	03/02/1979	Jos I Vandael	1e	Linda I Eerdekens
3e	05/01/1980	Stefan I Cuypers		
4e	10/01/1981	Dominique I Gorissen		
5e	09/01/1982	Mark I Peeters		
6e	08/01/1983	Jos II Moubax		
7e	07/01/1984	Frank I Vandenbosch	2e	Sandra I Verbeek
8e	05/01/1985	Johan I Janssens	3e	Christel I Droushoudt
9e	11/01/1986	Bart I Lemmens	4e	Ilse I Rietjens
10e	10/01/1987	Danny II Kunnen	5e	Linda II Bokken
11e	09/01/1988	Roberto I Maggen		
12e	07/01/1989	Jos III Craeghs		
13e	13/01/1990	Danny II Bakkers	6e	Inge I Brouwers
14e	12/01/1991	Angelo I Urlings	7e	Cindy I Nies

Môppe



... **Döpke Stals** kumptj mèt eine houp klachte bij **dokter Bullen**. Fòns begintj hum te ôngerzeuke. Al snel stoptj Fòns. “Jông”, zeet Bullen tege Döpke, “de môs dringendj stoppe mèt masturbere!” Döpke kiëkt op en zeet: “Boërom det, dokter?” “Jông ich wil dich diëne blooddrök pakke!” antwoordj Fòns.

... Waat is de beteikenis van ‘echtgenote’? Det is de verleejen tiëd van ‘echt geneete’!

... **Bèr Smeets** is bjeur vertrokke veur ‘ein masaasj’ bij de Thaise Lelie bij Rina en Riëk tegeneuver. Eigelik heet hëe anger planne, mer det kos ter neet zegke tege Maria...

Bèr geit binne en vreugtj: “Ich wil ôngerdanig zeen, vernederdj wèere en mich besjaamdj veule, waat môt det koste?” Het mèegdje antwoordj: “45 euro.” “45 euro?” zeet Bèr. “Det is goojekoup. Waat krieg ich dao den veur?” “Eine sjaal en ei t-sjurt van HOM. En den steur ich dich zoë de straot trök op!” zeet het wècht!

Môppe

... Het zingjt en kintj neet door ei vinster kiêke? De zangeres zônger raam!

... Dao kumtj eine Pool bij **dokter Hechtermans**.

Hèe heet last van ziën ouge, zeet 'r.
Hechtermans puktj hum mèt nao ein lètterkaart tege de moor: C Z W O N S T A C X Z.
"Jông kinse det lèeze", vreugtj Hechtermans.
"Lèeze?" zeet dèe Pool, "ich kin dèe kèerel zelfs!"

... **Jeugdprinses Silke**

kumtj bjeur mèt heur rapport. "Zoë ei slecht rapport", zeet vaajer Frank.
"Det verdeentj ei pak slèeg!"
"Kôm pa, wèe zeen weg", antwoordj Silke. "Ich weit de juffrouw woeëne!"

... Waat kriegse esse eine giraf mèt ei verke kruuësts? Veul halskorelètte!

... **Albert Royakkers**

kumtj bij **dokter Bullen**.
"Dokter", begintj Albert,
"es ich mèt **Christa** bjôs de leefdje bedriëf, huuër ich alzelève gefluit."
"Waat haajse den op diëne lèeftiëd nog verwachtj", zeet Fôns. "Applaus?!"

... **Pier Grispen** is mèt de ambulans nao het hospitaal gebrach veur ein ôngerzeuk. D'n dokter bekiëktj de rizultate en zuchtj ins. "Pier, diëne lèever is behuuërliek besjadigdj. Waat drinkse?"
Pier: "Muktj neet oët, waat hóbse staon?"

15e	11/01/1992	Prakash I Aendekerk	8e	Anniek I Geerdens
16e	09/01/1993	Wim I Govaerts	9e	Nelly I Janssens
17e	08/01/1994	Frank II Segers	10e	Jana I Neys
18e	14/01/1995	Christof I Nouwen	11e	Elke I de Graef
19e	13/01/1996	Roel I Bosmans	12e	Karen I Nies
20e	11/01/1997	Jeroen I Peeters	13e	Sara I de Graef
21e	10/01/1998	Mark II Janssens	14e	Isabelle I Bervoets
22e	09/01/1999	Frank III Houben	15e	Nathalie I Eerdekens
23e	08/01/2000	Sven I Vossen	16e	Sanne I Heymans
24e	13/01/2001	Sean I Steensels	17e	Jacintha I Brand
25e	12/01/2002	Maarten I Royakkers	18e	Lieve I Knippenberg
26e	11/01/2003	Brecht I Vanhoef	19e	Melissa I Kwaspen
27e	10/01/2004	Christoff II Voortmans	20e	Eline I Vandewal
28e	08/01/2005	Céderic I Verlaak	21e	Michelle I Hendriks
29e	15/01/2006	Jeroen II Royakkers	22e	Iris I Neel
30e	13/01/2007	Maxim I Vandewal	23e	Jana II Croimans
31e	12/01/2008	Yves I Gijssels	24e	Cheyenne I Breukers
32e	18/01/2009	Seppe I Vanwijck	25e	Lotte I Moonen
33e	17/01/2010	Jay-Dee I Breukers	26e	Rachel I Coonen
34e	16/01/2011	Lennert I Jaroszewski	27e	Lisa I Denier
35e	22/01/2012	Jordi I Moonen	28e	Laura I Janssen
36e	20/01/2013	Michael I Van Acht	29e	Fleur I Maessen
37e	19/01/2014	Stef I Stals	30e	Lotte II Jaroszewski
38e	18/01/2015	Jelle I Bogie	31e	Tessa I Dirckx
39e	16/01/2016	Jarne I Meurs	32e	Britt I Maessen
40e	14/01/2017	Pieter I Zuidam	33e	Niene I Bogie
41e	13/01/2018	Kyrann I Caris	34e	Jutta I Meurs
42e	12/01/2019	Mathis I Leen	35e	Ilani I Peeters
43e	11/01/2020	Sem I & Luca I Dirckx	36e	Jenthe I Neyens
44e	14/01/2023	Kent I Brouns	37e	Silke I Smeets

Veurzitters

1e	Jaak Van Eygen	1976 (nov) – 1978 (nov)	2 jaor
2e	Cornelis Peeters	1978 (nov) – 1982 (maa)	3 jaor 4 maondje
3e	Theo Vandael	1982 (maa) – 1985 (mei)	3 jaor 2 maondje
4e	Pierre Gielen	1985 (mei) – 1986 (sep)	1 jaor 4 maondje
5e	René Segers	1986 (sep) – 1995 (jan)	8 jaor 4 maondje *
6e	Jan Linssen	1995 (jan) – 2003 (nov)	8 jaor 11 maondje
7e	Albert Royakkers	2003 (nov) – 2006 (nov)	3 jaor
8e	Ivo Theys	2006 (nov) – 2009 (dec)	3 jaor 1 maondj
9e	Bart Neel	2009 (dec) – 2022 (nov)	12 jaor 11 maondje
10e	Wout Hoeken	2022 (nov) – ...	

*In d'n tiëd van René Segers, waas ter van augustus '91 tot augustus '92 geine veurzitter. In prinsiepe doordje het veurzittersjap van René dus 7 jaor en 4 maondje.

Vorste

1e	Theo Van Dael	1976 (nov) – 2001 (nov)	25 jaor
2e	Jos Moubax	2001 (nov) – 2010 (jan)	8 jaor 2 maondje
3e	Mark Hoedemakers	2010 (jan) – ...	13 jaor en tèllendje

Groeëtvorste

Groeëtvorst bèsse esse neet allein Vorst mer ouch Veurzitter bès. Det is inne loup der jaore mer eine kiër gebeurdj.

1e Theo Van Dael 1982 (maa) – 1985 (mei) 3 jaor 2 maondje

Ridders

Ridders in de Orde van de Rabbedabbers: d'n aafgaondje Prins, de aafgaondje Prinses, de Sjeepe van Kultuur en eederein woevan de veurzitter dinktj det 'r het verdeendj. In dit liëstje sômme wèe de aafgaondje Prins en Prinses neet op, mer diej wèere waal degelik alzelève geridderdj es ze aafgaon.

	(X = neemes, boeëte nateurlik aafgaondje P en PS)
21/01/1978	X
03/02/1979	Theo Schoofs (Sjeepe van Kultuur)
05/01/1980	Theo Van Dael (Vorst)
10/01/1981	X
09/01/1982	Willy Knippenberg & Anny Denier (Sjeepe van Kultuur)
08/01/1983	Frans Costens
07/01/1984	Bart Fiddelaers, René Theybers & Hubert Brouns (Sjeepe van Kultuur)
02/03/1984	Henri Klaps
05/01/1985	Jozef Vandewal
11/01/1986	Henri Verbeek & De Kin Royer (Reus Brookhook)
10/01/1987	Leo Snijkers & Cielke Eerdeken
09/01/1988	X
07/01/1989	Jos Poukens (Sjeepe van Kultuur), Theo Beynsberger (Sjeepe van Fiëstelikheede)
03/02/1990	Veus Peerlings
12/01/1991	Pierre Segers, Leo Heymans & Jan Moubax
11/01/1992	Crit Coolen
09/01/1993	Bèr Lindekens & Nelis Vleeschouwers
08/01/1994	Pierre Henckens
14/01/1995	Danny Vandael & Theo Henckens (Sjeepe van Kultuur)
13/01/1996	Jetje Tilmans, Vital Houben & Mathieu Kunnen
11/01/1997	Pierre Sniekers
10/01/1998	Joke Janssen
09/01/1999	Antoine Smeets & René Weerens
08/01/2000	X
13/01/2001	Pierre Verheyden (Sjeepe van fiëstelikheede)
12/01/2002	Danny Kunnen
11/01/2003	Jean Fiddelaers
10/01/2004	De Noordhook
08/01/2005	Jackie Terium
07/01/2006	Wout Hoeken
13/01/2007	Lei Henckens
12/01/2008	Piej Verlaek
10/01/2009	Vera Eerdeken
09/01/2010	Monik Stevens
08/01/2011	Leo Pepels
14/01/2012	Christof Meurs
12/01/2013	Jo Brouns
11/01/2014	Marc Meurs
10/01/2015	Dries Terium

Wist gèe det...

... **Jelle Hoeken en Hendrik Neyens kroëenridder** zeen gewore inne Orde vanne Rabbedabbers. Wèe wille zoë ôs appresjasiej oëtdrökke veur alles waat dees hiëre de lèste jaore veur de Kinderse karnaval hóbbe gedaon.

... **Carlo Cuypers en Dave Vanreyten** zeen tówgetreeje es noë lede vanne Raod van Èllef. Wèe winse hum minstes èveveul plezeer bij de Rabbedabbers!

... Ouch **Patrick Ghijsels** is trök tówgetreeje tot de RvE. Dèe heet ei paar jaor in ei boedistis kloëster gezèete òm te herbrônne.

... **Luc Walen** gestoptj is bij ôs vereiniging. En det wèe Luc bedanke veur alles waat hèe heet gedaon veur ôs.

... Ouch **Bart Vandersteegen en Yolanda Baens** ouch door dröktje bjeur eine stap achteroët hóbbe gezat. Bart en Yolanda wore Prins en Prinses in 2013.

... **Jacky Kit en Margot** zeen 5 daag nao Mallorca gewèest. Op dèen tiëd kwaam Jack 5 kilo bij! Mer good det ze gein 10 daag op vakansie zeen gegaon!

Wist gèe det...

... Zoëwaal ôs **Jeugdzitting** es ôs **Groeëte Prinsezitting** gewuuën wèeg TOP wore!
De jeugd en in het bezunjer ôzze Jeugdraod heet het bêste van zichzelf gegèeve oppe Jeugdzitting. Saoves oppe Groeëte Prinsezitting wore ter optreejes van de Raod van Èllef, de Aod Prinse, de Aod Prinsesse & de Dames vanne Raod, de Sjaaimakers, Ich & Dich, Rob & Mark, de Jeugdraod, Teije, Big Benny enne Gebroeders Ko. En het belangriëkste: Kinder waas massaal aanwezig, en gèe woordj ei geweldig publiek! Bedanktj!

... **Danny Kunnen** deendje oppe relliekros ein klacht in bie de wêdstriedleijing veur het vare mèt ein neet tóngestaone maot van benj. Gevolg: kôntrol veur eederein en d'n innige dèe diskwallefikasiej kreeg waas Danny zelf! Kuuëke!

... **Brecht 'Basdônk' Vanhoef** kwoom oppet Bastionfestival neet binne veurig jaor. Hèe wou eine sabel binnesmôkkele ôm ein fles sjampanj te sabrere!

... Qatar kiëkt tevreeje trök op heur WK. Het hiël spel heet mer 6.500 lèeves gekostj.

09/01/2016	X
14/01/2017	The All-Stars
13/01/2018	Pierre 'Piet' Verheyen
12/01/2019	Koninklijke schutterij St. Servatius Raam
11/01/2020	Marissa Di Girolamo
14/01/2023	Mathy Kwaspen

Kroeënridders

De hoeëgste ôngersjeijing binne de Kinderse karnaval is Kroeënrider in de Orde van de Rabbedabbers. Deze titel weurdj normaal gezeen jaarliks tóngekindj aan ei lid vanne Raod van Èllef (of Aod Prinse diej nog bie de vereniging aangeslote zeen) mèt staot van verdeenste en aan ei lid binnen de KVRK (de euverkoepelendje vereniging van de versjillendje karnavalsvereniginge of -groepe van aod-Kinder.

21/01/1978	Cornelis Peeters (RVE) & Aegten Jaak (RVE)
03/02/1979	Theo Van Dael (RVE) & Jan Houben (RVE)
05/01/1980	Gerard Bullen (RVE) & Henri Neyens (KVRK)
10/01/1981	Pierre Henckens (KVRK) & Gert Smeets (KVRK)
09/01/1982	Jaak Vandeweerd (RVE) & Frans Costens (KVRK)
08/01/1983	Henri Verbeek (RVE) & René Segers (RVE)
07/01/1984	Pierre Gielen (RVE) & Paul Colson (KVRK)
05/01/1985	Antoine Heymans (RVE) & Jacques Teuwen (KVRK)
11/01/1986	Jozef Eerdeken (RVE) & Herman Janssen (RVE)
10/01/1987	Paul Janssen (RVE) & Jos Truyen (RVE)
09/01/1988	Theo Caris (RVE) & Jozef Vandewal (KVRK)
07/01/1989	Servaes Peerlings (RVE) & René Theybers (RVE)
03/02/1990	Freddy Janssen (RVE) & Marc Vrolix (RVE)
12/01/1991	Mathieu Drouhoudt (RVE) & Jos Moubax (RVE)
11/01/1992	Jean Knippenberg (RVE) & Jaak Nies (RVE)
09/01/1993	Dominiek Verbeek (RVE) & Willy Fiddelaers (KVRK)
08/01/1994	Jan Linssen (RVE) & Mathieu Baens (KVRK)
14/01/1995	Ivo Theys (RVE) & Tony Camp (KVRK)
13/01/1996	Jos Vandael (RVE) & Ton Swennen (KVRK)
11/01/1997	Bert Verbeek & Willy Withofs
10/01/1998	Thè Segers (RVE) & Vital Houben (KVRK)
09/01/1999	Piej Verlaek (RVE) & Danny Kunnen (KVRK)
08/01/2000	Dave Bullen (RVE) & Nelis Vleeshouwers (KVRK)
13/01/2001	Dirk Mooren (OP)
12/01/2002	Danny Jaroszewski (RVE) & Rik Cuypers (KVRK)
11/01/2003	Miel Vandewal (OP) & René Lantmeeters (KVRK)
10/01/2004	Albert Royakkers (OP)
08/01/2005	Roland Dirkx (RVE)
07/01/2006	Jo Kwaspen (RVE)
13/01/2007	Mathy Vandewal (RVE)
12/01/2008	Jean Vanfloorop (OP)
10/01/2009	Marc Voortmans (RVE) & Bart Janssen (KVRK)
09/01/2010	Jack Vossen (OP) & Wout Hoeken (KVRK)
08/01/2011	Mark Hoedemakers (RVE) & Tom Prenen (KVRK)
14/01/2012	Bart Neel (RVE) & Koen Quix (KVRK)
12/01/2013	Sven Beelen (RVE) & Luc Walen (KVRK)
11/01/2014	Patrick Gijssels (RVE) & Dirk Stals (KVRK)
10/01/2015	Albert Royakkers (OP) & Hendrik Bruckers (KVRK)
09/01/2016	Tom Vanlee (RVE) & Sammy Paradis (KVRK)

14/01/2017	Dirk Bogie (OP) & Roel Baens (KVRK)
13/01/2018	Michel Pepels (KVRK)
12/01/2019	Marc Meurs (RVE)
11/01/2020	Ronald Zuidam (RVE), Stijn Goijens (KVRK) & Bèr Maessen U (FEN)
14/01/2023	Hendrik Neyens (RVE) & Jelle Hoeken (KVRK)

Opperkroënridders

De hoeëgste òngersjeijing is Opperkroënrider en det is allein mer weggelagd veur börgemeisters. Ziej kriëge eine karnavalsstèek.

05/01/1980	Gaspard Coolen
08/01/1983	Theo Schoofs
07/01/1989	Hubert Brouns
14/01/1995	Theo Schoofs
08/01/2000	Hubert Brouns
12/01/2012	Jo Brouns
14/01/2023	Wim Rutten

Ei bitje gesjiedenis van òs karnavalsgezèt De Rabbedabber

Van eindj jaore '70 tot eindj jaore '90

Òs karnavalsgezèt De Rabbedabber is zoë aod es òs vereeniging. Ze heet mèt anger weurd altiëd bestaon en is oppe kop aaf 46 jaor. Het ieëste gezètje haaj eigelik geine naam, dao stóng gewuuën 'De Kinderse Rabbedabbers' op. Opvallendj waas det 'r stökskes in het plat en stökskes oppe lètter in stònge, en det 't gewauwel oppe lètter euverheersdje. Het wore 4 gekleurdje blaajer, rekto verso betiptj en det zaat mèt 2 nietjes same.

Vanaaf de twiëdje karnavalsgezèt kreeg het gehiël ein bèeter oëtstraoling. 't Waas opins ein echte gezèt op A3 formaot in 4 blaajer en mèt eine titel: 'Het Rabbedabbertje'. Dèen titel waas het innige det oppe lètter gesjreve waas. De rest vanne artikels waas in het Kinders plat, op get reklaam van hanjelèers nao.

Det formaot en dèe opzèt zou nog veul jaore bliëve, mèt det versjil det

vanaaf edisie 3 de kleur van drök roeëd op wit waas.

In 1983 gebeurde ter volges mich get waat neet de bedoeling waas. Of toch? Ich höb 'Het Rabbedabbertje' van Prins Jan I zoëwaal in eine roeëje drök es in eine zwarte drök.

In 1986 of 1987 (ich höb de gezèt van '86 neet in miën archief) sjakeldje de vereeniging euver van A3 gezètgruuëdje en 4 blaajer, nao ei A4 beukske mèt es naam 'Het Rabbedabberke'. Ich höb de gezètjes van '85 tot en mèt '89 neet, dus ich kin neet zjust zègke wienië dèe òmslaag is gebeurdj. Van 4 blaajer A3 ging het ouch nao 12 blaajer A4, mer in de gezèt van 1990 stònge òngeviër 8 van diej 12 blaajer vol reklaam. Kwa inhoud ging het ter dus neet drek op veuroët.

Opvallendj van diej iëste 11 jaor karnavalsgezèt, is det ter hiël veul 'weurdjes van...' instònge. Weurdje vanne Vorst, vanne Veurzitter, vanne Jeugdprins, den Aod-Prins enne nòwwe Prins. Getruukeerdje of bewirkdje foto's vònse neet inne karnavalsgezèt.



Dèe euverdaad aan reklaam ging ter inne dao-op volgendje jaore oët. 't Rabbedabberke van 1996 waas inkel en allein samegestèldj mèt tekstj en foto's. Det waas ouch in 2001 nog het geval. 25 jaor karnavalsgezèt in Kinder waas det jaor ei feit. 25 jaor samegestèldj door het dageliks besteur vanne vereeniging, ònger drieëndje kracht van Tei Van Dael.

Het nòw mieleniejum

In 2002 bloos ter eine nòwwe windj. Aod-Prins Jos Moubax naam het stekske euver van Tei Van Dael, en es keesveese Vorst Jos pòk ter ouch de pen ter handj òm de redaksiej vanne karnavalsgezèt te leije. D'n ieëste 'De Rabbedabber' van ziën handj waas eine stijlbreuk. Trök op A3 gezètformaot, 4 groeëte blaajer mèt veul sjèele zeiver en ei klein bitje sirjeuze kal. Veur het ieëst ouch oët de locht gegrepe artiekels kwatsj, veurzeen van getruukeerdje foto's. Hiël opvallendj aan dèe ieëste 'Rabbedabber nòwwe stijl' waas de kleur vanne drök. Leechtblauw en dônkelblauw. Blauw dus. Ich höb mich laote wiës make det det ein vergissing waas. Ei foutje det het jaor trop weer recht woor gezatte. 't

Waas weer al roeëd en wit waat de klok slaag.

Het A3 gezètformaot zouw mer 2 of 3 jaor (De Rabbedabber van 2004 zitj helaas ouch neet in miën kolleksiej) mèt gaon. In 2005 waas het oppernôw ei beukske in A4, op 12 blaajer. Het droog nog altiëd de stempel van Vorst Jos, mèt veul sjëele zeiver en veul mōppe.

De 32ste jaorgank, de gezèt van 2009, waas de lèste ònger het bewindj van Vorst Jos. Het sjikke is det in diej 8ste karnavalsgezèt oët Jos ziëne koker, ouch ein van ziën bèste stökskes proza stuit: Aafsjeid van Dokter Bouts, ter gelegenheid van dèe lèste zië pensjoen. Ei fijnzinnig stökske humor vanne boveste plank.

De lèste 13 jaor

2010 luidje weer eine wissel van wacht in. Vorst Mark woor de dördje Vorst inne gesjiedenis vanne vereniging. Hèe mōs de brök slaon tösse 3x11 (november 2009) en 4x11 (november 2020) en moch ouch de door Tei en Jos jaorelank werm gehaoje stoel vanne hoofdredaksiej vanne Rabbedabber ònger ziëne buro sjuuëve. De ieëste gezèt ònger Vorst Mark ging wiejer boë diej veurige gezèt stopdje. Sjëele zeiver euver minse en dinger oët Kinder, dèk gebasseerdj op gebeurtenisse of noëts oët het veurbieje jaor. Formaot, aantal blaajer en kleur vanne drök bleef status kwo.

Veur de 34ste Rabbedabber ging het aantal foto's en het aantal blaajer de huuëgdje in: van 12 kiër eine A4 mèt kwatsj, nao 16 blaajer sjëele zeiver.

Inne 35ste Rabbedabber kwaam het 'weurdje vanne Vorst' trök van weg gewèest. Det zouw ter in bliëve tot op d'n daag van vandaag.

De Rabbedabber 2014 luidje weer eine hiële òmmezweij in. Veur d'n ieëste kiër volledig in kleur. Foel kolor wiej ze zègke en weer 16 blaajer. Veur de gelegenheid ouch in eine nòwwe leej-out!

In 2015 ging het aantal blaajer weer òmhoëg. Van 16 nao 20. En weer ei jaor later, in 2016, ging het van 20 nao 24 stöks. En de 40ste jaorgank, in 2017, teldje 28 blaajer. Het beukske waas miër en miër ei book aan 't wèere. Nog altiëd waas het devies: geine reklaam, inkel en allein ei blaad mèt de name van eedere hanjelèer dèe òs vereniging steundj.

De Rabbedabber van 2018 ging nao 32 blaajer A4, en ouch dèe van 2019 waas èeve dik. De 43ste jaorgank teldje 40 blaajer.


Toen kwaam corona. Jaorgank 45 en 46 bestaon mèt anger weurd neet. Sjaai.

Op dit momentj höbtj gèe De Rabbedabber 2023 vas. De 46ste jaorgank alweer. Hopelik belèeftj gèe ter mèt al diej angere Kinderse wuillesse veul plezeer aan. En es gèe strak dees gezèt mèt al dèe ònzin, kwatsj, en det bitje sirjeuze kal oët höbtj, dink den mer ins trök aan 46 jaor gesjiedenis. 46 jaor vol minse diej de karnaval neet allein wille mèt make in Kinder, mer hum ouch smaak gèeve mèt pèeper, zaot en sjëele zeiver.

Aan al diej luj diej de vastelaovendj mèt vorm gèeve, aan al diej luj diej det fiëst op de ein of anger meneer belichame, aan eederein dèe de karnaval op de zjuste wiës door geuftj aane volgendje generasies, zègk ich: van harte bedanktj. En veural: Kinder Alaaf! Rabbedabbers Alaaf!

Vorst Mark,
26 janewariej 2023

P.S.: Ich mankeer de Rabbedabbergezètjes van volgendje jaore in het archief: 1986, 1988, 2000 en 2004. Es eemes ze heet en kintj misse: gèer!



EI GEHEIM RESEPT VAN POOL FRIT!



Ôzze eige **Pool Frit** zal eeder jaor ein van ziën geheim resepte priës gèeve diej hèn gebroeuëkdje inne frituur vreuger, in Elkerlyck en inne Heerlijkheyd. Boë is d'n tiëd...

Pool heet ouch dit jaor weer zië bèst gedaon veur uch en veur ôs. Biej deze: het resept veur de broën saus en sjampienjôngsaus van Pool Frit!

Waat môjt gèe hole inne winkel?

- Uënje.
- Moëre.
- Laurierblaaier.
- Knorr kippeboejông.
- Greuntjeboejông.
- Tematpuree.
- Sjampienjôngs.
- Roum en/of kônjak.
- Wèe gaon ter van oët det gèe pèeper, zaot, boter, oliëfolie en bloom al in hoeës höbtj, en water zal ter ouch waal oët ugge kraan kôme...

Waat môjt gèe doon veur ei lekker ketelke sjampienjôngsaus van Pool Frit oppe taofel te kriëge?

Wèe beginne mèt de **beruchte broën saus**, de basis!

- Wèe make ieëst de basissaus: 1 fiën gesneeje uënj en 1 fiën gesneeje moër, get pèeper en zaot, ei bitje tijm en 2 laurierblaaier aanstove in oliëfolie of ei bitje boter.
- Brokkel ei blökske Knorr kippeboejông en ei

blökske greuntjeboejông en stoof det mèt mèt de greuntje. Good reure!

- Na ei paar menuute duise dao 2 à 3 sopepels tematpuree biej. Laot det mer ei paar menuute mètbakke. Waal good reure, of waat dachse?!
- Bevochtig mèt eine liter water. Laot det ongeveer 15 menuute doorkoke.
- Ming ei bitje water mèt 3 à 4 sopepels bloom, en ming det al reurendj ônger de saus.
- Biej de gewinstje dikdje, mósse de saus zifte.
- Smaak aaf: es het te sterk is, get water biej doon.
- Deh: dit is de broën saus diej es basis deentj veur alle anger sauze zoë-es dao zeen: sjampienjông-, stroganoff-, pèeperroumsaus... Dees basissaus kinse invreeze in kleiner porsies.

Op nao de sjampienjôngsaus!

- Sniej de sjampienjôngs.
- Stoof aan mèt oliëfolie of boter.
- Kruj mèt pèeper en zaot.
- Bevochtig mèt ei bitje water en laot ei paar menuute stove.
- Doot dao den de broën basissaus biej.
- Op het lèste: ei sjeutje roum en/of kônjak.

Hmm! Lekker en smakelik

Groete van Pool Frit!



SMAKELIK!!!



Flitse van oppe Kinjerzitting!



Begraffenisse Vancleef wiltj kleinere ekologisse vootaafdrök!

Môppe



Begraffenisse Vancleef geit veur klimaatneutrale begraffenisse. “Of toch mèt zoë eine klein meugelikke ekologisse vootaafdrök”, aldus **Betinna**. “Zoë wille wèe ôs steinke biejdage aan eine bèetere wèereldj.”

“Eederein ziën veerkantje mèeters: det is volledig achterhooldj. Het stijgendj aantal kremasies losse al veur ei deil diej ôngebreideldje inname van grôndj op, mer het kintj nog bèeter! Zjus wiej bije de kollumbariejums maag het geine taboe mieë zeen ôm te stapele. Ein pvc-buuës van ei paar mèeter lingdje en mèt eine diamèeter van 25 cm de grôndj in heije, en de kins dao minstes 10 pôt in kwiët. Vèerdig!”

“Minse diej toch nog de wèersnak wille oëthange en ein begrafenis mèt ein kist verkeeze, betale ekstra grôndjbelasting. Ich stël veur ôm mèt ei basistarief te wirke veur kiste diej rechtopstaondj de

grôndj in gaon, mèt vervolges eine biejkômendje taks dèe recht everedig mèt de hellingsgraad stijgtj. 90° is bèeterkoup es 45°, en die van 0° betale de volle pot. Det môt ein ôntraojendj effekt hōbbe.”

“Wèe hōbbe ouch de eige infrastruktuur ônger henj gepaktj. In plaats van altiëd mer nao Wieërt of Echt te mōtte sjeze veur ein kremasiej, kinne wèe det allewiel in eige beheer. Ich bèn gruuëts det det bovendeen erg zuuëning kintj zōnger het gebruuëk van gaas! Wèe hōbbe ôngertösse ôzze ieësten deenst achter de rök mèt behulp van ein wōrmdjepōmp. In eine tradisjonele gaasgestooldje ove geit de verbranning sneller, det is zjust, mer det zōrgtj ouch veur ein rillatief groeëte belasting van het miljeu. Mèt ôs wōrmdjepōmp weurdj het stoffelik euversjoot mieë geliëkmaotig opgewōrmdj en heet de familie in eine wèg ouch mieë tiëd ôm op het gemaak aafsjeid te pakke.”



... In café De Limburger zitj **Rik van Fiddelèers** aan het buffèt. Tege de frigo's hingtj ein plaat op mèt de aanbeejinge van de wèk. ‘Westmalle Trippel 3 euro. Bruuëdje kipfilee 4 euro. Masturbere 15 euro.’ Rik twiëfeltj.

“Zègk **Els**,” vreugtj Rik, “diej mastubaasiej, duis dich det zelf?”

“Jaozeker sjoëne jōng”, zeet Els mèt eine zwoele blik.

“Good!” zeet Rik. “Wilse den de henj efkes good wasse, want ich wil ei bruuëdje kip estebleef.”

... **Jeugdprins Kent** en vaajer **Dirk** staon mèt de otto aane leechte in Mezeik. Veur heur naas passeertj ein stoet otto's diej allemaol hël aan 't faope zeen.

“Papa, boëveur toetere diej otto's eigelik allemaol?” vreugtj Kent.

Dirk antwoordj: “Ômdet 'r eemes pas getrouwdj is.”

“Mer toetere duise toch ôm eemes te waarsjuwe?” zeet Kent verbaasdj.

“Det klopt miëne zoon, det kloptj”, antwoordj Dirk.

Wolfwatsj in Kinder!

Sins de wolf ouch opdook oppe Batte in Kinder, stuit het dörp in rep en roer. De wolf mukjtj get los, det is get waat zeker is. Veurstenjers, tegestjeners en luj waat het gein vets kintj sjëele: de höbs ze allemaol. Op det gebeed kinse het tema nog het bèst vergeliëke mèt voetbal, want oppe voetbal sneuveltj ouch al ins get of bliëftj get kepot.



Frank Vandersteegen, Thomas Linssen en Steef vanne Basdônk höbbe ein klup opgericht 'Wëers oppe Wolf'. Veural Frank heet ein oëtgesproke meining. "Hiej is gein plaats veur diej nôtte rotbiëste! Niks es mizeriej mèt en het is ein kwestie van tiëd veur het rejaal mislôptj. Diej greun boumknuffelëers höbbe gemekkelik kalle, diej haoje meital gein ponies of anger kleinvieë. Huuëgstes get hoonder, mer dao is dëe rotzak neet in geïnteresseerdj."


"Ôzze aksiegroep 'Wëers oppe Wolf' boltj good. Eederen dônderdig kôme wëe same bieij Thomas inne passiefwuüening ôm ôzze vergaderagenda aaf te wirke. Wëe beginne eederskiër mèt het puntj 'meldinge', gevolgdj door het

puntj 'strategisise aanpak'. Eindige doon wëe mèt de rônjdjvraag, boë-in wëe ins lekker los gaon mèt geknoter en geroop. Det luchtj altiëd lekker op."

"Wëe zeen ter trouwes in geslaagdij ôm ei good plan van aanpak oët te doktere. Thomas en ich zulle in ei kestuum van ein kôw plaats pakke op ein aafgeleegte stök veldj oppe Batte. Steef stëljt zich get wiejer op achter eine boum mèt de blaffer. Wëe höbbe 3 vergaderinge gesteheldj euver wëem inne kôntj en wëem inne kop vannet kôwbiëst zou kroëpe. Oëteindelik heet het lot beslistj: ich zit vanveur en haoj alles good inne gate, en Thomas geit vanachter en sjôdj appetiëtlik mèt ziën vot. Hëe is lokvogel en ich

bën speurendje arend. Es de wolf opdaagdij en aanviltj, euvermeistere wëe hum mèt eine flinke sjôp ônger ziën kloëte. Den kumtj Steef van achter ziëne boum oët ôm hum mèt ei goodgemiktj sjoot aaf te make wiej ei sjaop mèt het sôkkerfiëst. Klaor!"

Gijs en Jan Royakkers höbbe geine sjrik. "Det zeen rasechte karnivore, diej vrëete gein fruit. Det instinktj is trouwes es dusdanig ôntwikkeldj det diej ôs Pole en Roemene van kilomëeters aafstandj kinne ruuëke. Die make det biëst aaf mèt de bloëte henj en make ter zich ein lekker werm möts van veur inne kaaj wintjermaondje. Det risiko wilse nateurlik neet loupe es wolf."



Kinderse verkesbore zeuke alternatieve inkômste!



Kinder heur meist beroemdje verkesbore, **Marc van Hover en Steef vanne Basdônk**, zeen ter klaor mèt. “Ôndanks het feit det dèe stikstôf ei groeët probleem is, weigere diej verkes zich aan te passa. Eine gemiddeldje koesj stuuëtj nog èeveveul stikstôf oët es 5 jaor geleeje. Diej verkes sjiete nog zjus zoëveul es ieëst. Het liëktj es of het heur gaar neet interesseerdj.”

Marc en Steef gaon strak mer al te gèer in oppe oëtkoupregeling vanne euverheid. En tot dèen tiëd zeuke ze zich alvas alternatieve inkômste. “Allewel mósse gein kloëte miër kinne ôm geldj te verdeene wiej water. Terwiël Steef heet gekoze veur ein karjèere es TikTokker, en ganse daag denskes en stunts ligtj op te pakke bjeur inne lieving en boeëte in d’n hoof, gaon ich veur Onlie Fens.”

Steef vervolgtj: “Det danse geit mich eederskiër bèeter en bèeter aaf. Wiej ônuuëzeler, wiej miër

laajks. En mèt diej stunts is det nog eine graod erger! Vreuger deeje wèe eine Mentos in ein fles kola: lache! Mer veur de jeugd van allewel môt het get spektakulèerder zeen. Mèt diej paar iësdaag in december bèn ich inkel en allein geklèdj in ein string gaon sjaatse oppe Goërt, tot ich mèt de bujel door het iës zakdje. Det filmke is mer leefst 208.477 kiër bekeke op 3 daag!”

En Marc heet dus vollebak de kaart ‘Onlie Fens’ getrokke. “Jaozeker! De kaart én de flosj! Ich merkdje waal det miën akkount in het begin neet aansloog. Allein mer vètbèere diej bij mich terecht kwame, bah. Ich veuldje mich ein ordinèer stök spek. **Suzanne** heet mich den d’n tip gegèeve get aan miëne fyziek te doon en ich bèn beginne trèene wiej eine dulle. En toen ging het opins los. Ich môt mer gewuuën in ein ôngerbòks op ei sjaopevel te gaon ligge, aaf en tòw de bein oop doon en het geldj kumptj mèt bek oët de locht gevalle. Ich maak veul minder ore es in dèe vèttige verkesstal en wirk allewel tösse de sop en de petatte. Het sjikke van al is nog det ich nog het meeste verdeen mèt het opsteure van miën gedrage ôngerbòkse nao fens in binne- en boeëtelandj! Wiej krokanter, wiej miër het sjuuëftj!”





Flitse van oppe



Prinsezitting!



Olieboring Moubax dreijtj oët op niks!

Eine tiëd geleeje waas **Jos Moubax** in alle staote. Door het gek gèer kumtj hèe bjun. “**Wendy, Wendy!** De geluifs het noëjts”, viltj hèe mèt de deur in hoeës. =”Zjus waas ich op wanjel hiej bjôs langs tösse de kepotte denne enne rotzoëj, toen ich tot aan miën vèese inne ròwwe olie stòng! Het borreltj gewuuënwèeg op oët de gròndj! Wèe zeen rièk! Rièk zègk ich dich!”

In het groeëtste geheim ging Jos aane slaag òm de zjuste vergunninge ròndj te kriège, ònger het môm van het zette van eine appartementsblok. Einmaol het gaat gegrave, installeerdje ze eine jaoknikker dèe vader zaliger nog haaj ligge in ein van ziën sjòpkjes. Pòmpe wiej eine dulle,



mer het innigste waat ter oët diej gròndjlaoge kwaam, waas gròndjwater. Jos snapdje ter niks van, en sting dage aan ei stòk aan d’n draod te wachte op diej ièeste dròppels olie. Mer niks, hèe kwaam daag in daag oët van ein kaal kèrmis trök.

Op eine woonsdig naomiddig sjörgdj **Tattoo Jos** mèt ein volgelaaje kroekèr richting aafveurpötje aane straot. Moubax geit ins kièke en wètj neet waat hèe zuut. Liters zwarte vloeistòf! “Waat is mich det?” stameltj

‘r. “Det zuuëse toch, kaof. Det is miëne wèekelikse euversjoot tattoo-inktj. Of waat dachse? Ich kijdje det alzelèeve tösse diej struuëk hiej op det verlaote gelèeg van dich, mer det geit neet mië. Dao höbs dich ei gaat laote grave...”

Ei paar daag later waas op het Dòrp de kal oët. **Tamara Smolders en Eddy Willen** dinke ter het heure van. “Waat ein môp! D’n innigste olie waat hiej te vinje is, is remolie van diej ònnuuëzel kammejaos!”





Niks es mizeriej mèt kômposteerbare fritbekskes!

Op 50 jaor Kinder, aafgeloupe jaor oppet Bastion, kostse ter neet langs kiëke: kômposteerbare fritbekskes en houte bestèk. Het gevolg leet zich al snel roaje: niks es mizeriej!

Chantal en Patrick vanne Kaap hinge vol stoofvleissaus. “Dèe van mich is veul te sosjaal”, klaagtj Chantal. “Wèe ginge ôs allebei eine frit stoofvleis hole, hiël aane angere kantj vannet plein. Efkes aafsjuuëve, niks mis mèt. Mer den trök nao ôs hangtaöfelke. Ôm het hondsgezeik stoptj Patrick ôm get te zeivere mèt d’n eine nao d’n angere. Aaf en tòw nog eine pot beer ter bieje, en dèe môt den ouch oët. Ich höb tot 3 kiër tege hum gezag: nòw kôm, ôs èete

weurdj kaod! Tot het te laat waas. Inne lèste rechte lijn nao ôs taofel veul ôs de boojem oët het bekske. Pratsj! Hiël de kraom euver ôs hèer. Door de werme en vochtige saus is det bekske beginne smèlten van ônger. Det kriëgse mèt diej lômmele! Dèe honger is mer veur efkes en de kins dich gewuuën eine nòwwe bak hole, mer de minse bekiëke dich waal de ganse aovendj es of desse euver dich hèer höbs euvergegeve.”

Anouk Clement en Dorien Cleeren vônje het ouch 2 kiër niks. “Hiël d’n aovendj dèe smaak van hout inne moël: dao is niks appetiëtelijs aan. Zelfs nao eine bak beer en ein woost mèt saus preufdje de bek nog nao aafgelebbberdje tandestokerkes...”

Wist gèe det...

... **Jaak Jacobs** heet gekoze veur eine ‘softe bojkot’ van het WK voetbal. Hèe keek waal, mer weigerdje ter van te geneete!

... **Reinhilde Van Eygen** neet bang is veur de dördje wèereldjoorlog. Belsj huuërt namelijk neet bieje d’n dördje wèereldj.

... **Bèr Kuup** heet mèt geloupe oppe Kerstrun.

... **Tony Vanwijck en Roland Dirkx** de 2 jokers zeen dieje de zeuktocht nao eine nòwwe Prins hóbbe vervöldj. Einmaol de nòwwe Prins oët kwaam, wèere Tony en Roland belastj mèt de taak ôm es adjudantj de Prins en Prinses ei jaor te ontzörge en ze bieje wiëze van sprèeke de vot nao te drage.

... **Tessa Dirkx en Stef Stals** dieje iëer te beurt is gevallen bieje het keze van het nòwwe Jeugdprinsepaar.

... **Marc Voortmans van Lutje** toch ouch mer get kapaciteitstarief môt gaon betale. Es hèe mèt het leecht oët nao het huuëske geit, zitj ziej eederskiër mèt eine naate bril!

... **Kebap Huzur** dit jaor geïne sponsor is. En det de gezèt daoveur toch neet döner is!

Miel Vandewal

volledig gereviseerdj!

Miel Vandewal is intösse de 60 veurbiej. Hèe is al sins midde jaore '80 getrouwdj en heet zich het lèeve lank kepot gewirktj. Nèe, het lèeve heet hum neet òntzeen en den kumtj het dich al ins veur det het het ein en het anger verslete geraaktj.

Miel leet de kop neet hange, spraak ei paar van ziën gooj kòntakte en vertegewoordigers aan, en leet zich ins good ònger henj pakke. Het begos mèt eine nõwwe kni-j van Shimano en ein karbòn stök kaak van Colnago. "Det kriegse noëjts vanzèleve nog kepot!" zeet Miel gruuëts.

Einmaol de smaak te pakke ging Vandewal wiejer mèt de verbòwing. "Ich begos stillekes aan ouch last te kriegse van impotensiej, en det knaagdje toch aardig aan miën ego. Mèt get ditjes en detjes en eine splintjernòwwe groep, de Shimano Dura Ace Di2, sjakel ich allewiel vlot van zoë slap es ein kepotte hoon tot strak wiej eine beitel. Allein zeen mich de klitse al 2 kiër tösse d'n derjäär blieve hange. Den wètse neet boë te kroëpe!" Wèe vanne Rabbedabber zage det het good is. Den hedendaagse techniek stuit neet stil. Oppe Brookhook numme ze hum al de Mielminator. Wèe winse Miel nog veul plezeer mèt ziën gereviseerdje bodie!



Zörgvlied noeëdgedwônge fors aan 't bespare!

Môppe



In ôs woënzörgcentrum Zörgvlied hole ze de bôksereem hennig aan en zette ze ouch de tering nao de nering. Het is door de stijgendje kostpriës van enerzjie en köste in ôngerhaod neet mië te haoje op dees meneer. **Katrien Lenie** vannet rôsthoeës stuit ôs gèer te woord.

“Wèe höbbe drastis môtte snoeje in allerlei oëtgaveposte. Al ei paar maondj geleeje höbbe wèe de temperatuur laote zakke tot 32 graode. Biej ei bejaardetehoeës huuërt nateurlik ein ekstrem tropisse binnetemperature, mer det is veur ôs simpelwèeg neet mië op te bringe.”

“Mèt dèe piekstrom is het al hiëlemaol oplètte gebloaze. 's Middes alle veure aan: det geit neet. Den betale wèe ôs de maondj ter op blauw. Wèe höbbe dus de menuj al aangepastj. In ieëste instansie höbbe wèe get geëksperimenteerdj mèt kaoj boelètte in temattesaus en broën boeëne mer det goof ein forse stijging in het pamperverbruëk en de CO2-mèeter sloog kôntenuu aan. Wèe trokke den mer snel de

kaart van 2 kiër ôntbijtgraone – 's morges en 's aoves – en 's middes kaoj sjotel. Zoë kriëgtj eederein genôg sôkkers, vietamienes en vezels binne, en is de stoolgank neet te plat of te zaocht.”

“Waat animasiej betreftj is ter ouch het ein en anger verangerdj. De abonname te op Netflix en de kabel zeen opgezacht. Wèe wissele veurtaan eederen aovendj aaf tösse dvd's euver d'n oorlog, Sisi, de Sound of Music, Tita Touvenèer en Bassie en Adriaan. Biej de kienaovendje oppe demente-aafdeiling wirke wèe nog mer mèt eine priës, dèe van de eine nao d'n angere geit. Huuërse echt neemes euver klage.

“Vinger aane pols haoje is en bliëftj aangeweze. Wèe ôngerzeuke dus of wèe nog op anger meneere kinne bespare. Ôs bewoëners wèere standaardj 2 kiër per daag mèt ei washendje ônger de erm en tösse de batse gewasse. Ze moge eine kiër inne maondj ônger d'n doesj, mer es de waterfaktuur nog ônverwachs zou gaon stijge, môtte wèe good oëtrèekene of det soort verwinneriej nog meugelik is.”

... **Dries Terium** kumtj biej de baas binne geloupe. “Jông ich gaon ter hiej mèt stoppe”, zeet hèe tege **Patrick Doumen**. “Ich bèn ter meug aan, ich gaon ter mèt stoppe hiej. Ich verdeen veul te weinig!”

Patrick kiëktj raar op. “Mer waat geise den doon?”

Dries: “Ich gaon biej eine kammeraod van mich wirke, inne fruitsektor!”

Patrick: “Waat, inne fruitsektor? Det verdeendj toch minder es hiej bjôs?!”

Dries: “Det dinks dich mer! Dèe heet de aafgeloupe jaore 4 appartemente gezat mèt de opbringst van 1 proëm!”

... **Lutgarde Van Eygen** kumtj ônger het wanjele **Marina Henckens** tege. Ze kalle get euver kuj en kaover, es het opins euver het Roeëd Kruuës geit.

“Det blood gèeve, det doon ich neet miër!” zeet Marina fel.

“Waat?” antwoordj Lutgarde. “Det is toch ein gooj zaak, blood gèeve?”

Marina löptj aaf: “Gooj zaak? Ôndankbaar zeen ze dao! Ich stop ter mèt! Al diej raar vraoge waat ze dich dao stèlle...”

“Det zeen toch gein raar vraoge”, aldus Lutgarde. “Vins dich det?” is Marina op dreef. “Van wèem is det? Wiej kumse dao aan? Boëveur zitj det in eine ummer?”

Peter Cremers' Diner oppe Goërt!

Veurig jaor heet 'r ei paar maondj ei pòntòn gedreeve oppet grindjgaat in Ophove. Diner on de Leejk, zègk mer ei drievendj restoraov. En de wèts waat ze zègke: bèeter ein det drieftj es ein waat dich d'n deeperik in geit! Toch sloog het neet aan en vertrok het al èeve snel es det het gekòme waas. Wèe vanne Rabbedabber ginge òs leecht ins opstèeke bij **Peter Cremers**, anno 2023 de kullinèere goeroe van Kinder.

Peter: "Det kònsept veel dik tege

dao aane Maas. Nogal wiedes! 150 euro veur ein sumpele daagsjotel: diej zeen op heure kop gevalle! Veur de verdere rest haaj ouch neemes fatsoenlik naogedach euver sanitèere veurzeeninge. Òm te kinne kakke môzze se trök aan landj gaon, of dich mèt de vot euver de randj gaon hange. Ieëst en veural is dao weinig appetiètelik aan, en ten twieëdje stuise nog veur se het wèts in diën bloëte vot op internèt. Eederein zitj dich toch drek mèt de kamera in aanslaag?!"

"Ich höb dao ins good euver naogedach, en ich gaon det kòmmendje zomer zelf in henj pakke. Veul sumpeler en kleinsjaliger. Ich lègk ein vlot oppe Goërt mèt ein nummersloot, det tillefonis bij mich is te rizervere. Eine propere Dixie is daobiej inbegrepe. In miëne volottomatische ètottoomaat oppe Processiewèg kinse veur ein sjappelikke 32 euro veur 2 man ei barbekjoewpakkèt kòme trèkke, inklusief eine wegwerpbarbekjoew. Dao is namelijk niks zoë good es ein aojerwètse grilsjotel mèt zelf mètgebrachte pintjes."

Dao kintj Peter natuurlik waal ins 100% geliëk in hóbbe. Es wèe hum nog vraoge wiej det mèt brandveiligheid zitj in det bos dao, is Pé kategoriek: "Brandveiligheid? De zits in het midde van eine viëver, koekwaus!"



Kinderse kritisse dinkers: wèem zeen ze, waat drieftj ze?



C. (ze wiltj neet mèt heure volledige naam inne gezèt, want Bill Gates of – erger nog – het W.E.F. zou heur mer ins kinne trassere!) heet zich ônlangs aangeslote bij de aksiegroep 'wèerwaorheid', det zich ônger angere kritis opstèldj euver de zoeëgezagde zwaore règenval van 2 zomers geleeye. De Maas stông ôngemeen hoeëg en het Bastion in Kèsing stông bekans ônger water. "Leuges en bangmakeriej van de meenstriëm media," aldus C. "Kode oranje en al dèe kwatsj, dao is hiëlemaal niks bezunjers aane handj. De euverheid probeertj ôs sjiëtsjoew te make ôm ôs aane koeëj te haoje. Het is neet mieë of minder es ein gewuuën buj. Laot uch mer neet bang make, gank nao boeëte, pak uch vas, lèef! Nog eine gooje raod: stop mèt eine parapluj te gebruuëke! Wèe weite neet of zoë ein dink waal veilig is. Det is nog noëjts beweze. En esse naat règens, is de kans 99,99% zeker desse het gewuuën euverlèefs." Ein get ekstremere strèkking in Wèerwaorheid zeen de zoëgenaamdje 'antizaxers'. Diej weigere zandzekskes tege watereuverlast. Toen ze in Heppenieërt de zek vollebak oppe diëkmoor stapeldje, verrèkdje C.

ôm ouch mer ein toeët te lègge. "Det is ein meneer van Bill Gates ôm diën hoeës te infiltrere! Wèem wètj trouwes waat ze dao allemaal instèeke. Het kintj good zeen det 'r niks es PFOS inzitj! Of 5G straoling! Gank ôngerzeuk doon op internet, nog leefst vanal vieja Duitse of Hollandse artiekels. Doot uch ouge oop!"

Ouch bij de jeugd speeltj 'r het ein en anger. **Jeugdprins Kent** weigertj sins kort ziëne broccoli en sproeëte op te èete. "Esse zelf ôngezeuk duis, zulse zeen det det hiëlemaal neet zoë gezôndj is es de media dich wille doon geluive!" zeet hèe. "Ich num michzelf eine kritisse dinker. Ich hób op internèt de voedingswèerde van diej greuntje opgezoch. Dao zouwe allerlei vitamine en minerale inzitte, det is waat de zoëgenumdje wetesjappers verkôndige. Mer esse de broccolie en de sproeëte kepot kooks, wiej bjôs ma det duit, blieftj dao nog mer bezunjter weinig van euver. Ôm nog mer te zwiëge euver de meugelikke bijwirkinge. Boëveur is dao noëjts ôngerzeuk nao gedaon???"

CORONA Wist gèe det...

... **Bart Vandersteegen** heet geine corona g'hadj. Det virus wou neet binne, het haaj sjrik van VDS.

... Kinder heet ziëne eige **Jurgen C.** Allein zaat ôzze Jurgen Caris neet mèt waopes in ein bos verstopperke te speule, mer gewuuën mèt **Anneke** in ziëne achterbòw Cristal te zoëpe en Netflix te kiëke. Esser naoderhandj nao het huuëske môs gaon stônk het waal hennig, mer dao waas toen geine börgemeister op ziëne fits inne naober.

... De 11dje van de 11dje veere, boeëte op het gelèeg waas oppe Goërterhuuëskesstraot neet zônger risiko. Wèem is de mol???

... **Tom Vanlee** sting in ein of angere lockdown tege de hègk van Riejsjoeël Maaslandj te pisse. De pelisse hóbbe hum mer inne gang heivis gebrach...

In dees rubriek kintj gè
uch vraoge, klachte, ideeje,
roddels, bedinkinge en waat
nog allemaol kwiët aane
Rabbedabber. Wèe sensurere
niks, en gèeve gratis en veur
niks ôzze gooje raad aan uch
weg.

LÈEZERSBREEVE, SMSKES, EPKES OF MEEJLKES AANE RABBEDABBER!



Boë is miën leijer?

Bèste Rabbedabber
Ich bèn miën gooj leijer kwiët
geraaktj aane karnavalsloëds oppe
Raom. Alé het is te zègke: ei stök
ter van, het middelste. Ze sting
in de loëds en dao kintj normaal
gezeen neemes binne. Toch is ze
foetsjie... An bjôs is mer aan miën
oëre aan 't zèege det is de daakgeut
môt zuuëver make, mer ich kin
de leijer neet mië op! Heet eemes
toevallig det stök leijer örges zeen
ligge?
Groetjes, Bart Neel.

**Wèe höbbe ze neet gezeen.
Neet veur en neet nao het
opruuëme. Ze is zeker neet
gepiktj ôm ter mèt te gaon
wirke, want den haaje ze de
stèlling van Tony Vanwijck
ouch mèt geklauwdj...**

Boë is ôzze haan op aan?

Gezoch: haan van Scheyerveldj.
Lèst gezeen inne naober, örges in
't veurjaor. Lèst gehuuërdj inne
naober op woonsdig 9 november.
Groete, Dominique Leenders

Waas det toevallig dèe bèste kammeraad van Jurgen Caris?

Det het vrèktj!

Bèste Rabbedabber
Ich sjaam mich noëjts! En ich
höb al zeker geine last van
sproeisjaamdje! Boë isset toch op
aan aan 't gaon desse dich môs
sjaame veur eine sjoëne greune
peloës? Ich verzörg mië graas en ich
bèn ter fier op! Det het vrèktj!
Raf Nijs.

Es dich det vins, vinje wèe det ouch, Raf. Bliëve gaon!

Gratis op te hole

Ingevrore haan, wegges plaats tekort
inne diepvries.
Indeen intresse: zich wende tot
Peter Hoedemakers.

Is det mèt of zônger kogel?

Te koup

Ôkkaziej stök leijer te koup. Is get
krôm getrokke en hingtj vol vèrf.
Nog good te gebruuëke esse neet te
hoeëg môs wille gaon. 100 euro.
MVG, Hagel.

Sorry, gein intresse. Missjien heet Bart Neel ter waal get geldj veur euver?



Klacht

Daag Rabbedabber
Is hiej in Kinder geine kôntrol op decibels op fuive?! Ich hÛb nog alzelêeve oërsuizinge van oppe 40-jaorige tÛn van Bart VDS, bie Thieuke MeuledÛrp inne zaal. Waat ein teringherrie! Prene haaj hum al aardig ope staon, mer toen kwaam DJ Hex binne gestoëte. Het beer denderdje mich oët het glaas! Zelfs DJ Prenen vertrok zoë snel ter kos. Neet normaal!
Groete, Ronald Zuidam.

Dju Ronald, wèe lèeve mèt dich mèt. Wèe zouwe zègke: doot eine volgendje kiër mer sneller het leecht aan. Opgelostj.

Wèem?

Leefste Rabbedabber
Wèem is de voice van Scheyerveldj?
Wèem ligtj ganser daag en hiële aovendje te zinge en te kwake wiej eine mèerel? Ich vraag het names hiël de naober.
Groetjes, Dirk Bogie.


Ich zou het neet te wiëd gaon zeuke, Dirk. Beginne bjuch nèeve en zoë de riej aafgaon. Sukses!

Gevraagdj

Heet toevallig eemes ein okkaziej rechter ottodeur van eine Peugeot 208 ligke? Diej van mich hingtj los inne hingsels. Ich riej veur sjandaal

rôndj in Kinder en het trèktj zoë hel door d'n otto op det miën haor kônstantj oët model vleege. Leefst metaliek griës mer ein anger kleur maag ouch.
Vriendelikke groete, Patrick Ghijsels.

Binj dich diej toch gewuuën vast mèt ei stök touw. Mèt ei bitje meujte kumse al ei pak wiejer.



Lennert Jaroszweski is transgemeintjelijk!

“Ich bèn gebore en getoge in Kinder”, begintj **Lennert** zièn verhaal. “Mer ich veul mich ter neet toës. Deep vanbinne höb ich het alzelève geweite: ich bèn Bieëselèer.”

Opgruje in Kinder waas neet gemakkelik. “Ich veuldje det ich anders waas. Es oppe sjoeël de anger kinjer fijn aan het speule wore, zaat ich stiekem de boel te begaaje. Eedere zomer kreeg ich eine òntzettendje drang nao de Meulefiëste en in het algemeen veuldje ich mich veul bèter in miën vel es het kultureel nivo neet al te hoeëg waas.”

Sins Lennert zich ei paar jaor geeleje heet ge-outj, is hèn volledig ope geblujdj. “Miën aansloëting bij Hoeëger Op Bieësel waas ein openbaring. Det totaal gebrek aan ambisiej, het kònstante geveul det het water – of in Bieësel ieëder de Cristal – dich aane lippe stuit: heerlik! Het is het geveul det teltj.

In Bieësel is het te doon, hiej veul ich mich good!”

Het is en bliëftj ei razendj aktuweel tema, de geistelikke gezòndjheid. Toch zeen ter ouch anger geluide te huuëre. **Jan Smeets** is ei good veurbeeldj van eemes dèe waal in het zjuste liëf is gebore. “Ich bèn eine rasechte manskèerel”, vertèldj Jan ònòmwonje. “Ich höb het jaore lank veur miën eige gehaoje, mer den tiëd is riëp òm ope kaart te speule. Dao is wirkelik gein vets vrouweliks aan mich. Ich bèn euveriges zoë hetero es de pest. Ich bèn gebore es jòng en ich höb altiëd gedach: het is good zoë. Ich snapdje boëveur ich kort haor haaj en lang bòkse droog. Ich speuldje mèt ottookes en speuldje soldaat. Alles aan mich waas mannelik.” Jan hooptj mèt zièn ònthulling angere te inspirere. “Esse in het zjuste lieëf gebore bès, bliëf ter den neet stillekes mèt ròndj loupe. De moogs zeen wèem desse bès.”

Maarten Truijen is den weer verangerdj van sterrebeeldj. Maarten is gebore op 28 juni, es kreeft. Veurig jaor besloot hèn de knoup door te hakke. Nòw is ter wèegsjaal. “Van jòngs aaf aan wis ich det ich anders waas. Det karakter det bij kreefte huuërtj, det haaj ich hiëlemaol neet. Ich herkindje mich gaar-oët neet in anger kreefte. Ich ging mich miër en miër vraoge stèlle: wèem bèn ich eigelik? Veurig jaor besloot ich det het zoë neet langer wiejer kos. Ich höb gezoch nao meugelikhede òm van sterrebeeldj te verangere. Det ging neet zònger slaag of stoeët, dao ging ein hiël trajektj aan veuraaf. Het waas neet gemakkelik mer ich bèn blij det ich höb doorgezat. Es wèegsjaal höb ich eindelijk het geveul det ich maag zeen wèem ich bèn.” Maarten wiltj gèer minse diej mèt dezelfde geveules worstele nog eine gooje raad gèeve. “Verangere van sterrebeeldj is allewel good te doon, mer dink ter good euver nao. Het is ein beslissing diej groeëte gevolge heet veur diene horoskoop. Laot dich good begeleide door spesjaliste, esse de stap zèts!”



Môppe



Jaak Jacobs kumtj nao eine zwaore aovendj bij **Rina en Rièk** van kaffee Sport bjeur. Hèe leutj zich langs **Natalie** inne kôrf valle en viltj wiej eine blik in slaop. Hèe weurdj wakker aane poort vanne hemel, boë Petrus hum op stuit te wachte. Petrus zeet: “Jaak, de bès gestorve in diène slaop.” Jaak weurdj gek! “Det kintj neet! Ich wil nog neet sterve! Ich haoj teveul vannet lèeve!”

Petrus zeet: “De kins allein mer trök gaon es ein hoon.” Jaak antwoordj: “Zoëlank ich trök kin gaon nao ein boorderiej kort bij hoeës is het mich good.”

Zoë gezag, zoë gedaon. Dao stuit Jaak plots bedèktj mèt vèere en ploëme te dabbe inne grôndj bij **Wout en Lisbeth Hoeken** op het gelèeg. Eine haan kumtj aangeloupe. “Ah”, zeet d’n haan. “Dich bès de nòw hoon? Wiej beviltj dich d’n ieësten daag hiej?”

“Neet slecht”, zeet Jaak, “mer ich veul get raars inne pens, zjust al gaon ich òntploffè.”

“Zègk nòw neet des dich nog noëjts ein ei hõbs gelag? Òntspan dich, laot dich gaon, det is hiël normaal”, zeet d’n haan.

Jaak duit waat d’n haan hum zeet en efkes later ligktj ‘r ei prachtig groeët ei in het struuë. Jaak löptj euver van emosiej nao ziën ieëste kinnismaking mèt het moojersjap. Mèt volle euvergave lègktj ‘r nog ein ei. Zjust es hèe zich klaormuktj òm nog ei dördje ei te lègke, veultj Jaak eine slaag op ziëne kop en huuërtj hèe Natalie roope: “Jaak, Jaak! Wèer wakker! De bès in bèd aan ‘t sjiëte!!!”

Minister Brouns wiltj ouch zwartwirik gaon belaste!

De kans zitj 'r dik in det **minister Jo Brouns** binnekort ouch bòwbedrieëve, illetrikkers en luj inne sanitèrsektor geit laote belasting betale veur heur zwartwirik. Volges Jo òntstuit ter op diej meneer ein ieërlikker verdeiling vanne lastedrök.

Inne bòw- en klusbransj is het gebruuëkelik det veur òngeviër de hëlftj vanne inkômste geine btw en sosjaal premies weurdj aafgedrage. Brouns numtj diej sitewasiej 'ònwinselik'. "Eigelik is het raar det wèe nòw òngersjeid make tösse wit en zwart wirik. Veur det soort bedriëve zouwe dezelfdje fiskale regels môtte gelde es veur ander òngernumminge", aldus òzze minister.



Vanoët de bransj klinkt stevige krietiek op het plan van Brouns. Bòw- en klusbedrieëve vreeze det ze ei pak inkômste gaon misloupe es strak euver eeder wirik btw môt wèere aafgedrage.

"Dit plan raaktj veural klein òngernummers en einmansbedrieëve gliëk ich", zeet **Tony Vanwijck**. "Ich doon veural kleiner klusse veur partiekuleere, zoë-es het vervange van eine aafveur

of het zètte van ein sjefaasj. Het zouw gewuuënweg neet te doon zeen òm veur eedere prul btw te gaon aafdrage. Laote wèe toch estebleef alles haoje wiej het is: de hëlftj wit en de hëlft zwart. Veur mich persuuënlik heet det alzelève good gewirktj! Jo Brouns môt mich trouwes niks wieës make euver wit of zwart. Toen hèe de sente van Maaslandj NO beheerdje, huuërdje ich neemes zèege."



Kinderse klimaataktivist plektj nog altiëd vast!



“Veural de nachte zeen zwaor. Den staon ich hiej get te haoje en te riehere inne kaaj. Slaope geit neet want aaf en tòw passeertj ‘r toch nog ins eine otto of kammejao en diej sjiëne den mèt heur groeëte faar in miën ouge. En es **Jo Brouns** veur daag en douw de baan op geit, toetertj de sjefäör ins op mich.”

Aan het woord is **Patrick Golkowski**, dèe veur aandacht te vraoge veur het klimaat zich mèt de puëj heet vastgeplektj aanet kunstwirk op 't rëndj punt. Terwiël de meiste aktiviste al nao ei paar minuute wèere losgemaaktj, hingtj Patrick nog altiëd vast.

“Ze negere mich gewuuën. Op internèt haaj ich gezeen det angere nao get klimaatkal drek wèere losgeweiktj en aafgeveurdj. Det haaj ich hiej ouch verwachtj. Missjien bèn ich get te snel gewèest. Dit is nateurlik ouch geine echte kunst, mer ieëder ei liëlik zjevaakel. Ich haaj mich bèeter aan det dink van Hamaekers vastgeliëmdj dao in Ophove.”

Nao 4 daag zitj Patrick zichtbaar op zië tandjvleis. Veur de foto veur dees gezèt höbbe wèe hum efkes gesjore, dao haaj ter òs veur gesmeektj. Het meiste dankbaar waas ter veur de boterham dèe wèe mèt haaje veur hum. “Jao, ich höb het aaf en tòw meujlik”, geuftj Golkowski tòw. “De geis toch twiëfele. Heet het waal zin waat ich doon? Dao zeen daag det ich ter mèt wil kappe mer den dink ich: kôm op, pin haoje. Het geit hiej waal euver òs klimaat. Al kin ich nateurlik ouch miëne



pik-up wegdoon veur ei minder miljeubelastendj ottooke.”

De gemeindj wiltj Patrick tegemoot kômme in ziëne aktivistische drang. “Neet allein klimaataktiviste zeen hiej welkôm op het eventeplein in Ophove”, zeet sjepe van evente **Mark Hoedemakers**. “Ouch anger frustrasies moogse hiej lekker van dich aaf sjrieëwe. Dit plein is trouwes hiël lieëgdrempelig, het is ein simpel wei mèt graas boë desse heerlik kins demonstrere. Hiej kinse lekker giftig zeen. Het is

ouch fijn mètgepaktj detter draod rëndjôm stuit en eine wc is te regele mèt pèerdsklup Dongs Kamp. Eederein is hiej van harte welkôm, wiej serjeus desse het ouch meins of wiej gefliptj desse ouch bès!”



De krisis aktuweel: zwarte snieë in Kinder!

De krisis houwtj aardig òm zich hèer. De gaas- en stroumpriëze swinge de pan oët. Ouch in Kinder zeen ter luj diej ter ferm last van hōbbe. Òmdet wèe vanne Rabbedabber vinje det wèe ein belangriëke maatsjappelikke rol te vervōlle hōbbe, stake wèe op versjillendje plaatse òs naas aanet vinster. Ein euverzicht!

Tom Vanlee zuchtj es wèe aanbelle. Ouch hèe heet ziën lèeve aardig mōtte òmgoëje. Door de hoëge stroumpriës kintj 'r neet miër eederen daag de fritketel opzette. "Eine fritketel gebruuëktj al gauw 2000 watt. Mōs dich ins oëtrèekene waat het kostj òm dèe lōmmel eederen aovendj ein oor te laote bakke!" vertèldj Vanlee. "Diej dikköp in Brussel merke dao niks van, diej èete op restauraö en dao hoofse de stroom neet te betale. Mer de gewuuëne mins itj oët het fritvèt. En det kostj dich klauwe vol mèt geldj! Het is allewiel greuntje, èerpele mèt ei stökske vleis èete of hōnger lieje, zoë deep zeen wèe al gezōnke in dit apelandj!"

Lisa, de kleine van **Nancy Goijens en Matty Schuermans**, maag neet miër mèt stroom speule. "Lisa is gefasseneerdj door illetrik", vertèltj Nancy. "Wèe hōbbe kest vol mèt speulgood mer dao mōt ze neet van weite. Ze is leever bezig mèt draödjes, eine kattedekop en eine peeperklip. Het leefst zitj ze hiël daag mèt de vingerkes inneret stopkōntaktj. Ich dink det ze det prikkelendj gevoel waal fijn zal vinje. Mer nōw mōtte wèe toch get oppe köste gaon lètte."

Hiël get vroluuj laote heur okselhaor staon, zoëdet ze ouch mèt dees kaaj daag lekker werm bliëve en ze de sjefaasj get lieëger kinne zette. Ouch **Mia Vliegen** duit mèt! "Det haor geuftj mich ein nateurlikke izolasiej tege de kaaj. Ich sjèer hiëlemaol niks miër", zeet ze. "Õnger miën oksels, oppe bein en ouch op anger plaatse stuit intösse ein kōmfortabele vacht. De sjefaasj kintj hiël get groaje lieëger en det sjiltj òs hōngerde euro's. Zoë ein glaadgesjore Braziljaanse doeës is mèt diej kaaj winters gewuuënwèeg te deur." **Rudi**, heure mins, hiltj het kort es wèe ouch hum vraoge veur ein reaksiej: "Geine kōmmentaar!"

Sōmmige luj zeen echte bespaarkampioene. Ein zoë eine superbespaarder is **Rudy Theijbers**. Dèe sjarel heet zich al 36 daag neet miër gedoesjtj. "Vreuger ging ich eeder wèek ònger d'n doesj. Ich hōb aardig miën bèst mōtte doon òm diej gewuuëntje los te laote, mer nōw dink ich ter bekans neet mie aan", vertèltj Rudy fier. "Ich kin neet wachte oppe aafrekening volgendje maondj. Miën streefdoel

is ein besparing van 100 euro of miër. Es ich det hool, trakteer ich mich zelf op ei fleske deodorandj. Ich hōb ouch al aan **Bèr Èerdbiër en Keutel Neelen** dezen tip gegèeve, mer diej haoke allemaol nao ein wèek al aaf. Het ergste is det ze den naoderhandj toch dōrve klage euver de gaasrèekening. Den dink ich: hola, loëster ins, dich wouds doesje! En den biejkōmendj ouch stiekem oore aan ei stök ònger d'n doesj oppe tennis in Mezeik staon! Det gaon wèe volgendj jaor veule aan òs lidgeldj!"

Jack Vossen en Christel hōbbe de temperateur in heure sauna mèt 47 groaje verlieëgtj. De sauna geit verder es houte kot. "Õzze stroumpriës veur det stoke ging maol 4! Òm diej reeje hōbbe wèe beslistj den temperateur te laote zakke van 65 nao 18 groaje", aldus Jack. Aafgezeen van den temperateur verangertj 'r niks. Het waas missjien waal efkes winne, mer mèt de zjuste ingesteldjheid kinne wèe hiej nog lekker in òs bloeëte kōntj get kōme òntspanne in òs houte kot.



René Lantmèeters duit ouch ziën bèst òm te bespare. “Vreuger deej ich òmme 3 daag ein zuuëver òngerbòks aan, mer dèen tièd is langs. Het òngergood van allewiel kinse neet miër vergelièke mèt det van vreuger. Ich weit oët eige ervaring det zoë ein modern òngerbòks mekkelik ein wèek kan wèere gedrage. En de grens is nog neet bereiktj! Esse wèts det ei wasmesjien op 60 graoje bekans 2 euro aan stroom kostj, kinse zelf oëtrèekene waat geldj desse door rame en deure boeëte smits!”

Dao is ouch ein klein minderheid, mer ze bestaon waal degelik: luj diej zònger veul meujte heur rèekeninge kinne betale! Ònger heur **Ann Baens en Frank Smeets**. “De reaksies diej wèe kriège zeen versjrikkelik! Eederein lestig, kièke dich aan mèt de nak. Es koppel det ziën enerzjie kintj betale bèsse ein òngewinstje minderheid in dit dörp. Eine paria. Toch kinne



wèe ter zelf niks aan doon det het zoë geloupe is. Ei suksesvol bedriëf, get spare en juu. Het is òs gewuuën wèeg euverkòme.”

Nog ein anger geluid huuëre wèe bij **Pier Grispen**. Dèe klaagdje al euver de gestege priëze nog veur het trendie waas. “De kins mich röstig tot de hel kern rèekene. Ich waas, zègk mer, eine klager van het ieëste oor. Ich stòng al van miën kloëete te make aane kassa vanne Delhèes enne Aldi toen angere nog mèt de

glimlach stinge aaf te rèekene. Ich vònj alles al deur toen de rest nog noëjts van inflasiej haaj gehuuërd. In dèe zin kinse mich geröst eine trendzètter numme. De merks allewiel det ‘r veul nepklagers bij kòme. Zoë wirkjt det neet. Eine echte klager klaagtj alzelèeve, in slechte en in gooj tiëje. Det môt in dich zitte.”



Wout Hoeken wintj Kinderse poëziejpriës!

Mèlkvieëhaojer **Wout Hoeken** heet veurig jaor de Kinderse poëziejpriës gewònne mèt ziën minigedicht ‘Retteketet, zèt Demir op ein skutraket’. Hèe waas aanwezig op ein demonstrasiej tege de stikstòfmaotregule in Hasselt, toen hèe de aandacht trok vanne zjurie. Op ziëne traktàör waas ein plaat bevestigdj boë-op het gedicht sting gesjreve. Het geit òm ein zoëgenaamdj ‘distichon’, ei gedicht van 2 regels woëbij het woordj ‘retteketet’ rijmdj op ‘skutraket’.

“Het rijmpke trok ònmiddelk òs aandacht”, leutj zjurievezitter **Twan Smeets** weite. “Hoeken wètj de lèezer mèt ziën dichtkunst ònmiddelk te rake. In slechts 2 regels wètj Wout ziën deepste geveules van ònröst krachtig te verwoorde, daobiej op knappe wieës gebruuëk makendj van het oët de kunststaal òntlieëndje woord ‘retteketet’ en het foutief gesjreve skutraket det door het verwissele van de t mèt de d bewustj kònsternasiej geuftj.



Aan het winne van de priës is ei bedraag van 5000 euro verbònje. Òndanks de lovendje worde vanne vakzjurie, bliëftj Wout besjeije. “Sjik”, aldus Hoeken. “Ich oefen al jaore bjòs op het gelèeg mèt rijmkes en gedichte. Det bringjt nòw op.”

Gemeindj wiltj miër daakloze in strijd tege verspilling van èete!



Ôndanks de sterk gestege priëze van veul zake weurdj in ôs landj nog veul te veul èete verspildj. De gemeindj wiltj miër daakloze krejeere zoëdet èete det al is weggegoëdj ein 2dje kans kriëgtj.

“Wèe kalle euver ein ôngeluilfelikke verspilling”, zeet **Peter Nies**, sjepe van miljeu en deurzaamheid. Veural bij Chez Vie en d’n Okay, mer ouch bij partikuleere geit èete de kôntèener in det nog perfektj te verorbere is. Ômdet ‘r gein daakloze zeen diej het oët de kôntèener gaon vèsse, geit det nòw gewuuën nao Limburg.nèt. Det is doeëdzunj!”

“Biej ei gemiddeldj hoeëshaoje geit jaorliks dik 40 kilo èetbaar voedsel de voëlbak in. Tèl dao nog kneuk en graote boë-op desse nog kins knauwele bij op. Daakloze kinne dao nog prima van èete, mer den môtte diej ter waal zeen. Ouch luj wiej **Hagel**, diej neet volledig daakloos zeen mer in ei hutje innet bos woeëne, kinne ein wèzelik versjil make inzake ein deurzamere gemeindj.

Det sjepe Nies het good veur heet mèt gans of hawf ôntheemdje, bleek trouwes ouch de aafgeloupe fieëstdaag. Pé ging de straot op ôm fesse vodka oët te deile. Ouch Hagel waas ein van de gelökkige


diej ein fles in ôntvangst mochte pakke. “Dees luj hóbbe gein sjik kerstdiné, gein gezelligheid. Nòw hóbbe ze in eeder geval get te zoëpe”, aldus Pé.



Ed Smeets puktj Twitter euver!

“Het is eigenlijk begôes es ein grap”, begintj **Ed Smeets** es wèe hum profiesiejat wille gaon winse mèt het euverpakke van Twitter. “Ich dach: dèen Elon Musk muktj het waal hiël bôndj mèt ziën bevroaginge, ich gaon hum ins ei keukske van eige deig gèeve. En ja, nòw zit ich ter mèt, dèe Twitter...”

“Ich gaon ter dus mer het bèste van make. En ich gaon ter inne gang mèt de grove beustel door. Det geknoter, geklaag en gewauwel euver volstrèktj nutteloze tema's: det môt mer ins gedaon zèen. Ouch bij het huuëre van de minste sirèn wiej eine ordinèere ramptoerist ein vraag stèlle ‘waat ter oët is, boë het brandj en wèem de sjaai heet’: det doon ze mer in feejsbookgroepe wiej ‘de bès van Kinder’ of ‘veur en door de Kinderse luj’, mer neet mië op miën platform. Twitter ônger Ed is veurtaan sosjale media mèt stending. Ich laot inkel nog ruuëmdje veur diskussies euver belangriëke zake wiej dao zèen:



Red Bull, Jupiler en Formule Ein. Interessante kortinge gliëk ‘eine bak koupe en d’n twiëdje gratis’, det is info boë desse get mèt bès.

Ei blauw vinske achter diëne naam is te verkriëge door betaling

van eine bak Jupiler aan Ed. Lèt waal op: inkel en allein Jup. “Geine Karapils!” is Ed klaor en duuëdelik.



Losloupzone veur hunj kriëgtj aafspuitkabien!



Nao veul geklaag en viëve en zësse, heet de gemeindj geïnvesteerdj in ein aafspuitkabien aane hunjlosloupzone aanet Bastion in Kësing. Det waas den ouch nuuëdig, knoterre hiël get eigenèers van hunj oët Kinder.

Hendrik Neyens en Kim

Brouns zeen zjust dao mèt heur borderkollies Mia en Elly, es wè vanne Rabbedabber ein foto wille gaon trèkke vanne nòw installasiej. “Leever vandaag es mörge det det dink opperasjoneel is gewore. Diej zone ligktj op ein totaal verkiërdje plaats. Zègk nòw zelf: eine viëver mèt èendjes. Ich môt nog geine stek mie goeëje, want Mia heet hiej genôg te achtervolge en te apportere. Eederskiër kumptj ‘t

trök mèt ein hawf kepot gebete doëf of èenj. Gans naat en vèttig, de puuëj vol toter en de moël vol blood. Elly zjus van hetzelfdej. En den diej hunj weer d’n otto in! Det is ein en al vèttige petaaziej.

Mark Hoedemakers, sjepe van nateur en bos, stuit ôs tillefonis te woord. “Wèe hōbbe al diej klachte kritis bekeke, en vervolges gesjakeldj. Dao zeen al mië koppels gesjeije òmwille van teveul vètzakkeriej inne otto, dus wèe veuldje ôs moreel verplichtj ein aanpassing door te veure. Vanaaf hede kintj de gebruuëker vanne hunjlosloupzone ziëne veervoeter in kwestiej nao het losloupe en raoze in pratsj en èerd, gemekkelik aafspuite in ôs volottomatische aafspuitkabien! En den daonao

fris gewasse de kofferbak in. Ich zou waal wille vraoge òm bie het aafspuite get aafstandj te haoje tot d’n hōndj. Angers bleustse hum de haor vanne pens aaf. Ich hōb det vanzelèeve zelf ins mètgemaaktj bie ein van Jan Linsen ziën traktäors. De lak vloog in het rōndj. Det wils neet veur hōbbe mèt diën geleefdj hoeësdier. Eine naakshōndj: det is trouwes 3 kiër niks. Lieëlike bieëste!”



De Bèr 2023!



'De Bèr' zal regelmatig ònregelmatig wèere oëtgereiktj aan eemes dèe aan volgendje kriteeria volduut:

- De Kinderse karnavals-, vastelaoves- en volkskultuur mèt leefdje en respekt oëtdrage
- De gooj verstandjhaojing tösse de versjillendje vereniginge mèt beware en bewake
- Eine doëdgewuuëne wuiles zeen tösse de doëdgewuuën wuilesse

Es dao eeder jaor eemes aan volduut, zal ter eeder jaor weer eine 'Bèr' zeen dèe weurdj oëtgereiktj. Es wèe echter neemes treffe dèe ter bovenoët stiktj, den slaon wèe zônger veul tamtam ei jaor euver.

Dit jaor echter, vônj de zjurie det **Pool 'Frit' Janssen** eine verdeendje winnaar is van de Bèr. 46 jaor karnavalist, gèer ter bieje op aktiviteite binne de gemeindj Kinder en eine door Mezeik op

wanjelendje reklame veur wiej wèe het hiej doon, ônger ôs. Pool is fier op ôzze instèek. Op ôzze instèek boë ter zelf ein groeëte verdeenste in heet!



Het geheime lèeve van Wout Hoeken




Veurzitter en ôngerveurzitter Rabbedabbers, det is ein kwestie van gooj aafspraoke ôngerein. Beveurbeeldj: dao môt altiëd ein vanne twië wakker bliëve...

DIALEKTOËTZENDING
RADIO MONZA 106.5 FM
SJÈELE ZEIVER EN AMBIEJAOS OPPE
LOËSTERTOER TÖSSE 16 EN 23 ORE

GROEËTE STOET
& ACHTERAAF AMBIEJAOS
INNE BUNKER

VERKLËDJ BAL
@ KAFFEE SPORT
20:11 ORE - INKÓM GRATIS



FIBREWARIEJ
 3e wêk zón op 7:11 Prinsesmoandj 2023 . 370 zón ónger 18:11
17
 RADIODAAG
VRIËDIG

FIBREWARIEJ
 3e wêk zón op 7:11 Prinsesmoandj 2023 . 370 zón ónger 18:11
19
 STOETDAAG
ZÓNDIG

FIBREWARIEJ
 4e wêk zón op 7:11 Prinsesmoandj 2023 . 370 zón ónger 18:11
20
 BA(A)LDAAG
MAONDIG

